

# CHRISTOLOGY

## Christa chung changa kihilna

Paominlen Kipgen (PK), M.Th

Christology kiti thuchenghi Greek paova *Christos* le *Logos* kiti thucheng ni'a konna kiladoh hichu "Christa chung chang thu kihilna" tina ahi.

### BUNG – 1

#### AMIN HOLEH AKIMIN VONAHO

**1. JESU:** Jesu hi Christa aleiset min ahi. Jesu hi Hebrew paova *Yeshua/Jeshua/Joshua* ahin (Latin/Greek'a *Iesous* akitin, English'a Jesus ahi) hichu "Pakai chu huhhingna/huhhingpu/Sochatna (*the Lord is salvation*) ahi" tina ahi. Jesu/Yeshua hi chulaija dinga min kiha manchahloi ahi jeh'a midang toh hetkhen ahina dinga "Nazareth Jesu" ti'a kiseiji ahi. Jesu kiti minhi leisetna mihema ahungpena, hesoh genthei ahung thoh'a, ahung kineosah'a thina changeija mihemte lhatdoh na ahungthohna minchu ahi (Phil. 2:5-10)

Gospel 4 ho'a Jesu minhi 612 vei akimun, mungdanga 71 vei akimun ahi. Athi, akivui chuleh athokit changei chun "Jesu" kiti minhin akilang jingin, ahin atho kitjou nung kalin vang lekhatoh dunga chun Christa kiti min jengin akisei jingtai.

**2. CHRISTA:** Alangkhatna Christa hi Hebrai paova *Mashiyach* (Messiah ti'a kiseiji) ahin, hichu "thaonupa" (anointed one) tina ahi. Israelte lah'a chu Leng, Themgao le Thempu hohi atoh diuva ngansena munho'a na atoh theina diuva thao ana kinuji ahi. Jesu thaonupa akiti hin Abraham (thempu le themgao) le David (leng le thempu) sanga chungnungjo'a Leng, Themgao le Thempu – athuma dinga thaonu ahi.

Hiche minhi Gospeh ho'a 56 vei akimun (John. 1:41, 4:25) chuleh lekhatoh ho'a 256 vei akimui. Pathen mite Israel chaten hiche minhi ana kineppi dehsetnu ahi.

**3. PAKAI (LORD):** Hiche minhi Christa Pathen ahina, athaneina min ahi. Elohim kiti min Pathen thum khat (trinity) kigoma Pathen khatesh kiseina'a kimangcha min ahi (Jn. 1:26; 2:4-21; 4:6,9,15).

'lord' kiti'a ajem ngatna kisun hin kitepna thah'a 'Pakai' ahilouleh 'master' ahilouleh 'jipa' titoh kibang ahin, Hebrai paova Adonai kititoh kibang ahi (Eph. 6:9; Col. 4:1).

**4. PAKAI JESU CHRISTA:** Hiche min thum kigom hi mikhat minbou kihetna ahin, vetsahna chomchom aneijin ahi. Pathen'in mihemte huhhingna dinga adeilhen minho chu ahi (Acts. 4:12). **Pakai** kiti minhi Christa le atahsan ho kikah'a kijopmatna vetsahna ahi. Chuleh hichehi jatah'a kikouna minjong ahi. Sarah jongchun ajipa chu Pakai anati.

**Jesu** kiti minhi huhhingpu tina ahin, leisetna mihema ahungpena min chu ahi (Mk. 1:21). **Christa** kiti minhi thaonu tina ahi. Jesu mina huhhingna na atoh jou nunga lhanna konna athodoh nunga Pathen'in achoi'atna min chu ahi. Chuleh ahung kiteng jongleh hiche min mama'a hi hungding ahin, chuleh kumsanga jong hiche minna hi lengvai ahungpoh ding ahi.

**5. KEIMA:** Keima kiti minhi Pathen min ahin, kitepna luija Pathen'in Ama min dingin ana mangchan; Mose koma Pathen chun "KEIMA" tin mihemin ana kiphongin ahi (Ex. 3:14; 6:23). Chuleh kitepna thah'a Pakai Jesun ama min dingin ahin mangcha kitne (Jn. 6:48, 51; 8:58).

**6. PATHEN CHAPA:** Pakai Jesu Christa chu Pathen chapa dihtah mong mong ahi (Mtt. 3:17; 8:29; Lk. 1:35; Jn. 5:18; 17:1-3). Pathen chapa itahsan uva kon chun 'atahsan eiho jong Pathen chate ihuvin; Pathen chate ihtah jeh uva chapa toh Pa gou ilokhom dingu ahi (Jn. 1:12; Gal. 4:6-7).

**7. MIHEM CHAPA:** Hichehi Jesun adang jouse sanga ama kiseina aha manchah pen thucheng ahi. Mihem chapa kitihi NT sunga 84 vei akimui. Gospel sunga 80 vei (Matthew'a 29 vei; Mark'a 14 vei; Luke'a 24 vei; John'a 13 vei) tobang akimangin, abona hi Jesun ama kiseina aman ahisoh keije. Solchah sunga khatvei, Hebrai sungah khatvei, chuleh Thuphon'a nivei akimun ahi. Lekhathot ho'a hiche minhi akimulouna jehchu Christa chu Houbung dinga mihem lengvaipo'a hung ahilou jeh ahi. Ahin houbung luchang akitijoi (Col. 1:18).

Hichehi Messiah'a kiminvona/Messianic title ahin (Dan. 7:13,14), Jesu Christa amihem hina, akineosahna leh bolgentheile kikhetbeh'a aum ding (Jn. 3:14; 8:28) seinah ahi. Chule Mihem Chapa hi ahunglung ding phatna athanei ding le loupina achan ding (Jn. 5:27; 9:39; cf. Dan. 7:13,14) seinan jong akimange. Christa ahung kitteng jongleh mihem limle mel pu'a hung ding, kumsang sunga lengvai ahungpohding avetsah'in ahi (Mtt. 8:20; 24:27; Lk. 19:10).

**8. DAVID CHAPA:** Tahsalam pendola Christa, Messiah, Israelte lengpa chu David leng phunga konna hungpeng ahina avetsah'in ahi (Mk. 10:47; 2 Sam. 7:4-17). David chapa kitihi Messiah kiminvona (Messianic title) ahi (Matt. 1:1; 9:27; 12:23; 15:22; 20:30; 21:7,15; 22:42,45; Mk. 10:47). Jesu hi David chilhah, David laltouna'a touding ahi vetsahna ahi. David hi Israel insung le Juda insung dinga mi upa pen hihih hen, Israel leng masapen hihih jongleh, Pathen'in Israel chungah lengvai podinga anatundoh, Pathen lunglam mitah (1 Sam. 13:14 cf. Acts. 13:22), chule Messiah penna dinga analhena kitepna ana neipi pa ahi (2 Sam. 7:12-16; cf. 1 Chr. 22:9-10). David jonghi Pathen thaonu ahin, leng le thempu dinga thaonu ana chang ahi.

**9. ADAM NUNUNG:** Tahsalam pendola Christa chu apeng nunungjo ahijeh'a Adam cha kiti ahi. Ajehchu Adam chu tahsalam pendola mijouse hungpen dohnapa ahin, chute ma'a chu Christa jong lhagao lamma atahsan jouse hung pendohna pa ahijeh'a Adam nina kiti ahi (1 Cor. 15:45-47; Rom. 5:12ff).

**10. RABBI:** Hebrew paova houhil tina ahi (Jn. 1:38, 3:2)

**11. RABONNI:** Rabboni kiti hi houhil tina toh kibang ahin, Aramaic paova houhil ti'a homtho tah'a kouna ahi. Hiche min hi athodoh nunga kikounan akimangin ahi. (Jn. 20:16).

## **BUNG – 2**

### **LEISET NA AHUNG PEN MASANG**

Christa leisetna ahungpen hi ahung um (existence) kiptatna ahipoi. Pathen chu thum khat (Trinity) ahi itiu tolhonin Chapa Pathen Christa jong hi Pathen ahin, Pa Pathen le Lhagao Theng Pathen banga tonsotna anaum peh ahitai. John. 1:1 na'a "Thu chu atilin ana'ume" tia'a aseina'a Thu atikhu Christa

aseina ahin, aseinom chu Thilsem jouse kipat (Gen. 1:1) najong Christa chu ana umsa ahitai atina ahi. Chugoh hilouvin thilsem ijakai jouse jong hi amasem leh amavanga um ahisoh keije (John. 1:10; Col. 1:16).

Thilsem goh hilouvin Christa hi leisetna ahung pen masanga patna natong thupi tah khatjong anahi. Tahsa'a ahung penlou vangin Christa chun Old Testament mitheng holah'a na anatongin, Christopheny'a ana kiphondoh jingin ahi. Christopheny kiti hi Christa Bethlehemah tahsa'a ahung pen masanga vantil melpu'a mihemho henga ana kiphondoh jina seina ahin, Pakai Vantil tin ana kilah'in, na anatong jin ahi. Gahvet dingin:

1. Jacob to ana kihou vantil chu Christa Vantil lima ana umchu ahi (Gen. 32:24-30).
2. Hamboh lah'a meikonga Mose henga thu hinsei Pakai Vantil chu Christa ahi (Ex. 3:2).
3. Meilhum sunga Hebrew gollhang thumho umpi'a anahuh doh Pakai Vantil kitichu ahi (Dan. 3).
4. Gen. 22:11-18; 31:11-13; Num. 22:22-35; Judg. 6:11-23; I Kings. 19:5-7 ho'a jong akimun ahi.

Chuhogoh hilouvin Christa leisetna ahungpen ding lim vetsahna OT'a mi tampi akimun ahi.

1. **Adam:** Adam chu tahsalam'a chile nam jouse hung kondohna pa ahibanga Christa jong atahsanho jouse dinga lhagaova ahungkon dohna pao ahi (1 Cor. 15:45-50). Adam vanga vannoija chonsetle thina hunglut ahin (Rom. 5:11-12), Christa vanga tonsot hinna hunglung ahi (Rom. 6:23; 5:17).

2. **Melchizedek:** Amahi Christa lima anaum ahi. Melchizedek ahin Christa ahin tonsot thempu akiti cheh lhonin ahi. Christa jong Pathen ahina'a Melchizedek banga penna nule pa neilou, Alpha le Omega kiti jenga ahi (Gen. 14:18-20; Heb. 5:6-10; 6:20; Rev. 1:8)

3. **Isaac:** Isaac apan angailut chapa changkhat seh aneisun Moriah munna pumgo thilto dinga apedoh banga Christa jong APan chapa changkhat seh'a aneisun vannoi dinga Cross'a apedoh ahi (Gen. 21:1-4; 22:1-18; Heb. 11:17-20)

4. **Joseph:** Joseph apan angailut bangchun Christa jong Apa Pathen'in angailun, Joseph asopihon apa ngailut ahijeh'a chanpha achanding athangsetpi bangun Christa jong apa ngailut ahijeh chun chanpha achanding asopi (Juda) hon athangsep piuve. Joseph asopihon ajoh doh bangun Christa jong asopihon ajoh doh'un, Joseph asopihotoh ahung kithah hetdoh banguva Christa jong tribulation akichaikon leh asopiho toh hung kithah mutouva kihedoh cheh ding ahivu (Gen. 37:3-4; 50:15-20; Acts. 7:9-13).

5. **Mose:** Mose ami Israel chate huhhingpu ahibangin Christa jong vannoi huhhingpu ahi. Mose themgaolen ahibanga Christa jong themgaolen hija ahi (Deut. 18:15; 34:10).

6. **Aaron:** Aaron hi Christa thempu chungnung lima anaum ahi (Ex. 28:1; Heb.5:1-6).

7. **David:** David kelngoi chingpha ahibanga Christa jong kelngoi (Houbung) chingpha ahi (Ps. 23:1-6; John. 10:11-16).

Mihemma vetsah na akimu goh hilouvin, thilho limma jong vetsahna aumme.

1. **Hin thing:** Eden hona hinna thingphung chu Christa vetkah na'a anaum ahi (Gen. 2:9; 3:22-24; Rev. 2:7; 22:2).

2. **Noah kong:** Noah konga atahsan na Noah insung mite twisang lenna kon asochat banguva Christa tahsanho jong vannoi chonset manthahna'a kon socha ding ahiuve (Gen. 6:4-14; 7:1).

3. **Manna:** Christa amale ama changlhah toh akitekah'in ahi. Israelte dinga Manna/changlhah chu gamthipma avaitham sunguva a'oiva nao ahin, hibanga chu Christa chu lhagaova tonsot hinna changlhah ahi (Jn. 6:35, 48).

4. **Horeb songpi:** Gamthipma Israel chate adangchah laijuva adon dinguva twi hungputdoh na songpi – Horeb songpi chu Christa vetsahna ahi (Ex. 17:1-9; Num. 20:1-13; 1 Cor. 10:4). Israel chaten hiche twi chu adon uva adangnou banguva Christa hintwi chu adon jouse Lhagaova hing ding ahi (Jn. 4:13-14).

5. **Sum'eng gul lim:** Israel chaten gamthipma Pathen douna'a achonjeh uva Pathen'in gotna apeh uva gul alansah'a; gulin achuh ho ahin kitna diuva Pathen'in Mose jah'a sumeng gul lim seminlang thingka chungah tahsangin, ave jouse hingding ahin, ave louse thiding ahi ati'a avesese ahin uva avelouse athigam chu - Christa Cross'a ahung thi tahsan hon hinna aneidiu, atahsan louho themmo changa athidiu vetsahna ahi (John. 3:14-17; Num. 2:8-9; ; 2 Cor. 5:21).

## BUNG – 3

### CHRISTA LEISETNA AHUNG PENDING KISEI MASAH

Christa leisetna hetsah masah louva hung penga ahipoi. Themgao hon tampitah vei anasei jingsao ahin, Phat alhin tah'a hung penga ahi (Gal. 4:4).

#### AHUNG PENDING KISEIMASAH

1. Israel insunga kon hung pending (Num. 24:17-19; cf. Mtt. 1:1-17).
2. Judah phunga David insunga kon hungpeng ding (Gen. 49:10; Isai. 11:1; cf. Luke. 1:31-32).
3. Bethlehem'a hungpeng ding (Micah. 5:2; cf. Lk. 1:31-32).
4. Nungah thenga hungpeng ding (Isai. 7:14; cf. Mtt. 1:18,22,23).
5. Christa hungding phat chu tepsa anahi (Dan. 9:24-26 - hapta 69 (ni 490) lhinni chetna kikhen beh ahi).
6. Christa hungding masang aseiphong khat hungding ahi (Isai. 40:3; cf. Mtt. 3:3).
7. Messiah chu Pathen hiding ahi (Isai. 9:6; cf. Jn. 1:14).

#### AHINKHO DING KISEI MASAH:

1. Achapan lai phatsung chomkhat Egypt gamma aga manding (Hos. 11:1).
2. Genthei thoh'a chonsetna kon lhatdohna na atohding (Isai. 53:4-6 cf. 2 Cor. 5:21).
3. Jerusalem jonna sangan nou chungah touding (Zech. 9:9, cf. Mtt. 21:2-5).
4. Cross'a athoh gimlai tahleh lengpi twi le loukha apehdiu (Ps. 69:21 cf. Mtt.27:34).
5. Romete dan dungjuja agu kisubong ding chu khatcha jong kisubong louding (Ps. 34:20; Ex. 12:46, cf. John. 19:33-36).

6. Aponsil vang vetna'a kineiding (Ps. 22:18; cf. Mtt. 27:35).
7. Anat thogimma athiding konle thu aseiding (Ps. 22:1; cf. Mk. 15:34).
8. Athi'a kon thoukit ding (Ps. 16:10, cf. Acts. 1:2-3).

## **BUNG – 4**

### **JESU NUNGAH THENGA AHUNG PEN**

Mihem jouse apen masanga patna chonse ahitai (Ps. 51:5; 58:3) akitin, mihema pengjouse Adam chonset jala chonse hisoh keija, chonset man Pathen lunghan jeh'a thina chu changsoh keidingu ahi. Ahin Christa vang chonset na neilou ahi akitin, hichu iti hithei ham? OT Messiah/Christa chu nungah theng sunga kon hungkijila hungpeng ding ahi tin themgao hon anaseijin ahi (Isai. 7:14). Christa chu pasal'a kon kijila hungpeng hilouva, Lhagaothenga kijila nungah theng Mary sunga hungpeng ahijeh jala chonsetna neilou, michonseteho lhandampu hithei ahi.

Hebrew'a nungah theng (virgin) hi *betulah* kiti ahin, Isaiah 7:14'a thucheng kimang hi *almaah* joh ahin, hichu english'a maiden (nungah) kiti ahi. *almaah* hi nungah theng khelkhel seinu hilouvin, nungah jile cha neitheiho kiseina jong akimang ahi (cf. Prov. 30:19). Hijongleh Matthew hin Hebrew text hilouva Greek Septuagint (Greek paova OT kiledoh, LXX ti'a kihe) joh alahson ahin, Greek'a chun *parthenos* akitin, hichu nungahtheng/virgin tina ahi. Isai. 7:14 na chun "*almah*" (nungah) seinu hijeng jongleh Matthew'in NT 'a Matthew gospel anajih'a chu Greek paova anajih ahin, Jesu chu nungah thenga kijil ahi ti aphotchet nan Greek thucheng "*parthenos*" kiti chu ana mangin, Jesu chu nungah theng Mariam sunga kijila hungpenga ahin, Joseph ajihol pa'a kon ahipon, midang'a kon jong ahipoi ti avetsah'e. Matthew'in aseibe na'a Joseph chun Mariam akichen pi jeng vang chun Jesu apen masang kahsen akitimat pipoi ati (Mtt. 1:25).

Matthew hin Mariam chu Pathen haikhumna chang puma nungahtheng ahi ti'a ajih goh hilouvin, Luke 1:34 ivetle Mariam'in Vantil jah'a chun "Pasal la kahe khapon/I know not a man (KJV)" atin, hichun pasal to kakitimat khapoi atina ahi. Mariam chun Pakai Vantil koma ajou aseilouding, ajou aseijongleh amatdoh ding ahin; Pathen'in jong Mariam chu nungahtheng ahijeh'a alhen ahi.

Jesu Christa leisetna mihemma tahsaphe pu'a ahungpen Bible thuhil hi Christiante jouse dinga itahsannaokibulphuna pipen ahi. Tonsot Pathen chapa chu mihemte lhatdoh dinga mihem tahsaphe lim pu'a mihema ahungpen jeng hi thil kidangtah chu ahi (1 Jn. 1:14; 1 Tim. 3:16). Ahin Mihemte lhatdohna natong dinga hung ahijeh'a mihem limle mel, vouso, lungthim le tahsa'a apen ngai ahin, hijeh'a chu eiho khat bang banga hunga ahi. Christa chu tahsaphe pu'a mihema ahungpen kiti hin avetsah pen chu Pathen chu mihemte henga tahsa hung kiphong tina ahi (Rom. 8:3; Jn. 1:1, 14,18; 1 Tim. 3:16).

Ahileh ibolla Jesu Christa chu mihema hung pieng khohkhoh ham?

1. Mihemte henga Pathen phongdoh dinga hung ahi/to reveal God (Jn. 1:18, ).
2. Themgao ho thusei guilhun nadinga hung ahi (Gen. 3:15; Isai. 7:14).
3. Pathen leh mihemte kah'a palai dinga hunga ahi – bridge the chasm between God and man (1 Tim. 2:5). Pathen leh mihem kah'a kiguijopna chu chonset jeh'a tanna ahitan, hiche kiguijopna chu sutoh dinga chu hunga ahi.
4. Mihemte achonset naova kona ahuhhing theina dinga hunga ahi (Mtt. 18:11).

5. Thilsem jouse huhdoh dinga hunga ahi (Rom. 8:19-23).

## **BUNG – 5**

### **CHRISTA AHINA HO (Personality)**

Bible'a hin Christan apenpi hindan ni chamkimtah'in aneije ti akimun ahi. Akhatna chu Pathen ahidan akitin, chuleh anina chu mihema apienpi hindan. Christa Jesu sunga hi hiche ni teni hi kikhen theilou, pumkhatna umkhom ahin;  $50+50=100\%$  hilouva,  $100+100=100\%$  hija ahi. Hijeh chun Christa chu 100% na mihem lhingset leh 100% Pathen jong hija ahi.

#### **I. CHRISTA PATHEN AHINA**

1. Jesu Christa chu Pakai tin akiseije (Ps. 110:1; cf. Mtt. 22:41-46; Mk. 12:35-36; Lk. 20:39-44; Acts. 2:34).
2. Nungah thenga apen hi Pathen mihe te lah'a ahung chen kiphon dohna ahi. Isai. 7:14 cf. Mtt.1:23 'Immanuel' kiti chun Pathen'in eiumpiuve, Pathen eiho lah'a aumme tina ahi.
3. Messiah, Pakai Jesu Christa chu achungthu gaova ana kisei chun Pathen hina min anakisah'e. Isai. 9:6,7; thumopthem cf. Ps. 16:7, Kidangtah cf. Lk. 18:19; Pathen thaneitah; Tonsot Pathen cf. Jn. 10:30 anakitin ahi.
4. Christa hi tonsotna ana umsan akiseije/tonsotna umjing sa ahi (Micah. 5:2; Jn. 8:58; Isai. 9:6; Jn. 1:3).
5. Pathen ahin Christa ahin aminhon "KEIMA" tin aseih cheh cheh lhone. Exodus 3:14 na' Pathen Mose henga akilahna'a amin "KEIMA kahi dingchu kahijinge" ti'a anasei bangin Christa jong John 8:58 na'a "KEIMA Abraham masanga ana'um kahitai" ati. Hiche Pathen min KEIMA aman jeh'a hi Judaten Pathen ataitome tia songa selih ding anagotnu ahi.
6. Christan Chonsetna angaidame (Mk. 2:5,7; Mtt. 9:2,6). Chonset ngaidamna hi Pathen'in bou anei ahin, Christan chonset angaidam hin Pathen ataitomna hilouva Pathen ahina avetsah leh aphondoh ahi.
7. Jesu Christa Amatah Pa leh Lhagao Theng toh kibangin akiseije (Mtt. 28:19 cf. 2 Cor.13:14).
8. Munjouse'a phatkhatna um ahi (Omnipresence). Hiche hi Pathen hina ahin, Christan jong aneije (Mtt. 18:20; Jn. 14:20).
9. Ijakai hesoh ahi (Omniscience). Hiche jonghi Pathen'in bou anei ahina khat ahin, Christan jong aneije (Mk. 11:2-6; Mtt. 12:40; 24:3-31; Rev. 2:23)
10. Hatchungnung (Omnipotence) ahi. Pathen'in bou anei hina ahu kitnin, Christan jong aneije (Mtt. 28:18; Isai. 9:6; Rev. 1:8).
11. Thilsem theina tha aneijin, ijakai sema jong ahi. Thilsem kitihin imacha umlou hela kon thilkhat sem atina ahin, Pathen'in bou abolthei ahi; hicheho jouse bola chu Christa ahi (Jn. 1;1-3; Heb. 1;3; Col. 1:16).

12. Thil jouse chungu thaneina ahije. Lk. 8:24 Hui chungu; Mk. 4:39 twipi kinong chungu; Mtt. 14:25,26 twi chungu lam ajot.

13. Pathen bou houding'a lom leh houding ahichu Christa jong chanding adapoi (received worship due only to God). Lk. 4:8 na'a Satan jah'a Pathen bou houding ahi anatin, ahin Jn. 9:38 mitcho kho amusah pan ahou ding adapon hichun avetsah chu Amatah jong Pathen ahina ahi.

14. Thomas in aphondohna chu anakisane. Jn. 20:28 a Thomas'in "ka Pakai le ka Pathen" anati chun Thomsa nasei khelle tilouvin hiche min chu anakisan ne.

15. Kikhel tih neilou ahi (unchangeable - Heb. 13:8).

16. Athaneidan: Thilsemho goh hilouva mihem ho jouse chungu athaneina hin Pathen ahina aphot chet ahi (Mtt. 28:19-20; Rev. 22:12-13).

17. Mithi akaithou dan: Pathen'in bou mithiho thosahna tha aneichu Jesun jong aneije (Jn. 6:39,44; 11:44).

18. Thutan ding ahi hin Pathen ahina aphondoh'e (John. 5:22; 2 Tim. 4:1).

19. Amatah Pathen toh kibangin akiseije (John. 10:30).

20. Amatah athokit chu Pathen ahina aphotchetna lenpen ahi (Rom. 1:4; 6:4). Athokit hin Christa chu Pathen chapa tahbeh ahi ahoptchet ahi. Jesu chu ajou seija, bolthu maimai hileh thoukit louding, ninunung ni'a thutan na'a themo chan ngah'a umding ahin, Rom. 6:4 dungjujin Pathen amatah'in Jesu Christa chu athodoh ahi ati. Pathen'in Christa Pathen ahina chu aphondoh le aphotchet na'a athi'a kona akaithou kit ahi.

21. Pathen natoh 5 hohi Christa natoh tin akiseijin ahi: Thilsem, Venbit (preservation), Ngaidam chan, Mithi thokit le Thutanna (Jn. 1:3; Heb. 1:3; Lk. 7:48; John. 5:22; 6:39).

22. Atheng (Mk. 1:24; I Pet. 24:22; Jn. 19:4).

23. Chonpha (Jn. 2:14-17; Acts. 17:31).

24. Ngailut (John. 15:13; 11:36).

25. Mihepi (Titus. 3:5).

26. Kitah tah (2Tim. 2:13).

## **II. CHRISTA PATHEN AHIPOI (Pathen toh akibangpoi) TI'A DEMNA**

1. Pathen chu phele vou neilou lhagao ahin, Christan phe le vou, gule chang aneije (Jn. 4:24; Lk. 24:39).

Christa chu mihem ahijala phe le vou anei ahin, hinlah Pathen ahijal chun ama jong Lhagao ahi. Mutheilou Pathen chu muthei ahunghi theina dinga chu phele vou aneingai ahi (I Tim. 2:5; 3:16).

2. Christa chun kipatna aneijin, Pathen'in vang kipatna aneipoi (Jn. 8:42; Ps. 90:20).

Jesu mihem ahina'a chu kipatna anei ahi. Ajeh chu lhagotheng'a kon kijila nungah tenga hungpeng ahi. Ahin Pathen ahina chu akipatna leh akichaina umlou ahi (Jn. 8:56-59; Col. 1:17; John. 1:18, Isai. 9:6).

**3.** Aman Pathen chu Pa tin akouve (Mtt. 27:46; Jn. 20:17).

Jesu chu mihem tahsa'a aum jala Pathen chu Pa ti'a akou ahi

**4.** Pan leisetna dinga ahinsol ahi (Jn. 8:42).

Pathen'in Jesu leisetna ahinsol akiti teng adasa sa'a hungkisol hilou, Jesu amatah kiphala hung'a ahin, Pathen sanga anoinun johna aumdehpoi (Lk. 19:10; 1 Tim. 1:15; Gal. 4:4,5).

**5.** Pathen chu aluchang ahi (1 Cor. 11:3).

Pa, Cha le Lhagotheng Thum khat hohin tohmun chomchek thakhatna atoh jaluva, alamkai (executive administrator) ngai ahin, Pan hiche munchu alo ahi. Aahin hichejeh'a chu Cha le Lhago chu neojo ahipoi.

**6.** Mihem akiti (Jn. 8:40; 1 Tim. 2:5).

Christa chu Pathen jong hija mihem jong hija ahi.

**7.** Christa chu Pathen ahipon, ibonnuva Pathen cha ihi banguva Christa jong Pathen cha hija ahi.

Mihem chu ipentah teng 'Pathen cha kihiji bep ahi' (Jn. 1:12). Ahin Christa vang Pathen chapa changkhatseh (Jn. 3:16), midangho to banglouva dinmun tumbek nei ahi. Pathen Chapa kitih Pathen toh kibang ahi (Phil. 2:6).

**8.** Pan thaneina apah ahi (Mtt. 28:18).

Phil. 2:5-8 na'a chapa chun athaneina jouse chu kiphaltah'a (voluntary) apahdoh (surrender) ahi atikin, hinlah Christa athokit jouva chu Pathen'in hiche thaneina chu alepek kit ahi.

**9.** Pathen'in Pakaija asem ahi (Acts. 2:36).

Hiche hi aPathen hina dinmun dopsang na hilouvin, Pathen'in mihemte henga Christa ahina dihtah chu aphondohna joh ahi.

**10.** Pathen noija akipelutne (1 Cor. 15:28).

Hiche hin Christa ahina (nature) aseina hilouvin adinmun (position) aseina joh ahi. Christa chun noinun ding achu ahin, achamlouva kibolsah hilou, aman akilhen ahi.

**11.** Pathen chu thithe lou ahin, hinlah Christa ath'e (1 Tim. 1:17; Lk. 23:46; Acts. 2:32).

Jesu Mihem ahina pa chu thi'a ahin, APathen hina chu thingailou ahi (Heb. 2:9).

**12.** Keisangin Kapa chu alenjoi ati (Jn. 14:28).

Hiche jonghin ahina (nature) aseina hilouvin, kiphaltah'a noinun achuna jala adinmun aseina hi.

### **III. CHAPA LE PA KIGUIJOPNA**



1. Pakai Jesu chu Pathen ahijala Pa toh kibanga ahi. John 5:18 na'a Jesun Sabbath apalkeh goh hilouva Pathen toh kibangin akiseijeh'in Juda hon Jesu tha ding agouvin ahi. Juda ten Pathen khat bou ahentu ahin (Deut. 6:40), Christan Pathen toh kibang kahi atichu Pathen taitomna'a alah'u ahin hijeh'a chu songa selih ding agotu ahi (cf. Lev. 24:12). Ahin Christa chu Pathen toh kibang, amatah jong Pathen hija ahi. John 10:30 na'a "Kei leh Kapa khat kahi honne" atihin Pa toh akibah aphotchetna ahi. John 14:9 "Keima eimu'a chun Pa chu amu ahitai" atin, Pa le Cha chu khat ahi'a atumtum hihon ahi. Col. 1:5 nan "Christa chu mutheilou Pathen lim ahi" atin; Lhagao ahijeh'a mutheilou Pathen chu Christa'a kilang ahi. John 1:1 nan "Atilla chu thu um ahin, thu chu Pathen ahi" atikhu Thu khun Christa aseina ahi. Hiche leh adang dang 1 Jn. 5:20; Jn. 17:5; Titus. 2:13; Heb. 1:8; Jude. 25; Col. 2:9; Mtt. 17:2 ho'a kimu dungjui jin Pakai Jesu Christa hi pa toh thakhat/kibang ahin, pumkhat hilhon, ahi'a atumtum hilhon, dinmun kibang chet, Pathen hicheh lhon ahi.

2. Christa mihema ahung pen jeh'a Pa noiya kunna Pa noiya um ahi. Jesu Christa mihem ahunghi'a chu achamtah'a kiphaldoh'a noinun achu'a kineosah'a ahin; Pa noiya um dinga kipe doh ahi. Hijeh'a chu Jesun Pa sanga noinung jo'a akisei jiteng amihem hina, akineosah naleh noinung jodinga akipehdohna aseina hijia ahi (Jn. 14:28). Christa leiset mihema ahungpena chu amasanga toh bang louhela Pathen toh kiguijopna thahbeh leh chombek anei ahin, hichu chung nunna leh noinun na ahi.

#### **A. Christa Pa noiya akipehluhna leh aneo johna ho:**

- i. Aleiset hinkho chu Pa jeh'a hinga ahi (Jn. 6:57).
- ii. Jesun amacham tah'in ima aboltheipon, Pa jala bou abol ahi (Jn. 5:19).
- iii. Jesu Christa chu Pan leisetna ahinsol ahi (Jn. 6:29).
- iv. Pan chapa chu thuneina leh lamhilna apah ahi (Jn. 10:18).
- v. Jesun athusei dingho chu Pa'a kon na amu ahi (Jn. 8:26).
- vi. Pan Jesu chu tohding apen ahi (Jn. 5:36; Jn. 17:4).
- vii. Pan lenggam chu Chapa khutna apedoh'e (Lk. 22:29).
- viii. Houbung khang sunghin Jesu Christa chu Pathen luchang hina noiya akipedoh'e (1Cor. 11:3)
- ix. Christa chu mihemte Pa heng alhun theina dinguva lampi ahung hi (Heb. 7:25).
- x. Christa chu Pa heng jotna le huhhingna lampi ahin, lampi khatseh chu ahi (Jn. 14:6).
- xi. Jesun Pa chu "Ka Pathen" atin aseije (Jn. 20:17; Mtt. 27:46).

#### **B. Christa itihchan Pa noiya umding ham?**

Luke 22:29 na'a Pan Chapa chu lenggam ape'e atin, Chapan hiche lenggam chu Pa henga alepeh doh kitding ahi (1 Cor. 15:24). Christa Pa noiya akun dinghi tuleiset khang kichai gei, Laltouna bangmai thutan na gallam peh gei hiding ahi (cf. 1 Cor. 15:27,28).

#### **IV. JESU CHRISTA MIHEM AHINA**

Jesu chu Pathen ahigoh hilouvin mihem hina jong bulhingsetnin aneije. Bible'a kimu dungjujin:

1. Jesu chu mihem min akipen/akimin von ahi (Mt. 1:21 cf. 1:23; 1 Tim. 2:5). Mihem chapa kiti min hin mihem ahina vetsah na ahin, 84 vei akimun ahi.

2. Jesun mihem phunggui aneijin ahi. Jesu mihem ahito lhonnin mihem insung guijong aneijin ahi. Numei Mariam'a kon ahin (Lk. 2:7; Gal. 4:4); David chilhah ahin (Acts. 13:23); Abraham Chilhah ahin (Mt. 1:1-16); Adam chilhah ahi (Lk. 3:23-38; cf. Heb. 7:14).

3. Jesun mihem tahsa hina (physical nature) aneijin ahi. Jn. 1:14 na'a Thu tahsa ahung soh'in, eiho lah'a ahung changing (cf. Heb. 2:14), phe leh thisan aneije. 1 John. 4:3 nan "Christa mihem ahi tahsan louchu Anti-Christa ahi" ati.

4. Jesu chu Mihem hina dan noiija aumin, mihem chon le khantou bangin akhangtouvinn, mihem natoh bang bang atonge.

- i. Ahungkhang len cheh cheh'e (Lk. 2:40).
- ii. Thu adong ji'e (Lk. 2:46, Jerusalem houina).
- iii. Chihna'a akhang tou cheh cheh'e (Lk. 2:52).
- iv. Thu amange (Heb. 5:8).
- v. Hesoh genthei athoh'e (Heb. 2:18, 10).
- vi. Kum 30 alhin geijin thing thembolin apange (Mk. 6:3; Lk. 3:23).
- vii. Lhepna atoh'e (Mtt. 4:1-11).

5. Mihemin anei hina le ngaichat na ho aneije.

- i. Agil akelle (Mtt. 4:2; 21:18).
- ii. Adang achah'e (Jn. 4:7; Jn. 19:28).
- iii. Achol/alel theije (Jn. 4:6).
- iv. A'ih mu ji'e (Mtt. 8:24).
- v. Ngailut aneije (Mk. 10:21; Jn. 11:36).
- vi. Mi akhoto'e (Mtt. 9:36; Mtt. 23:37).
- vii. Alunghangin, alung naji'e (Mk. 3:4; Jn. 2:16).
- viii. Jana neitah'a tahsana aneije (Heb. 5:7).
- ix. Alunghem ji'e (Jn. 11:33).
- x. Akap'e (Jn. 11:35; Mtt. 26:38; Lk. 19:41; Heb. 5:7).
- xi. Atao ji'e (Mtt. 14:23; Heb. 4:15).
- xii. Alunghem theije (Mtt. 8:24).

6. Jesun Tahsa (body), hinna (soul) leh Lhagao (spirit) aneije.

- i. Tahsa (Jn. 1:14; Heb. 2:14; Mtt. 26:12; Lk. 23:52-56).
- ii. Hinna (Mtt. 26:38; Lk. 23:43 (eiho Bible'a lhagao tin ilet'uve)
- iii. Lhagao (Lk. 23:46). Athi jouva Pa henga kile kitchu ahi.

7. Jesu chu athi'e. Mihem chu athidinga penga ahi. Heb. 9:27 nan mihem chu khatvei thitei ding ahi atin, Jesun jong hiche hi atoh'e (Lk. 23:33; Heb. 2:9).

## BUNG – 6

### CHRISTA CHONSET NEILOU AHIDAN

#### 1. CHRISTA CHONSET NEILOU AHI HILCHETNA

Chonset hin Pathen lungdei toh kitoh louva um, Pathen lungdei bulhit lou aseina ahin; alangkhatna chonsetlou hin Pathen lungdei toh kitoh'a um le chon aseina ahi. Christa chu Pathen lungdei juibukim dinga hunga ajuibukim jala chonselou ahi (Heb. 10:7; Jn. 17:4). Chonset chu polam muthei (guhchat, jousei, toltha...) goh hilouva sunga lam jong ahi (Mtt. 15:19). Jesu vang asung jong apo'a jong chonsetna neilou ahin, aphalam le athenga lam ngena hinga ahi. Heb. 7:26 nan Christa chonset na neilou ahidan aseina'a 'Atheng, themmo na neilou, bohbehrou, chonset to kichomkhen' atin ahi. Peter'in jong Christa chonsetna neilou ahi aseijin "kelngoinou banga bohbehrou/nolnabei" anati (1 Pet. 1:19 cf. Heb. 9:14).

#### 2. CHRISTA CHONSETNA NEILOU AHI DAN

Acts. 4:27,30 na'a "Nachapa theng Jesu" kiti thucheng 2 veijen aseijin, hiche hin Jesu chu apena patna atheng, chonsetna neilou le bohna jouse'a kon onghol ahi aseina ahi. Mk. 1;24 cf. Lk. 4:34 na'a thilha/lhagaoboh chun "Pathen theng" nahi tin aseije. Christa chonsetna neilou ahi aphotchet na pen chu lhagaoboh ho'a kamchenga kon hungpot doh chu hilouvin, Pathen thu, Pathen in ahaikhum sunga akisut jeh ahi. I Jn. 3:5; 2 Cor. 5:21; Heb. 4:15 ho ivet leh Christa chonsetna neilou eiho jeh'a chonse'a akisim thu akimui.

#### 3. JESU CHONSET NA NEILOU AHINA CHUNGA MIHEM HO KAMMA KON PHONDOH AHI (testimony).

**i. Jesu amatah'in ase:** Aman miho chonsetna amun, ahin ama'a chonsetna akimupoi (Jn. 8:46). Christa chu mihem maimai hileh Adam chonsetna chu aneiding, chonset'a kigel ding ahin, Chuti ahiloujeh chun aman achonset thu aseikhapon, ngaidam jong athum khapoi. Asunga chu lungthim gilou umlou, abona chamkim le atheng hija ahi.

**ii. Pontius Pilate:** Jesu thu atan chun athemmo na le achonsetna amudoh poi (Jn. 18:38).

**iii. Mrs. Pontius Pilate (Pilate jinu):** Jesu toh kitimatna leh kiguijopna anei louhel vangin amang jalchun apasal henga thu ahinthotnin, "Hiche mi chonpha (atheng, adih) pa chu ima loh'ih'in ahungti sah'e (Mtt. 27:19).

**iv. Cross'a kikhai guchapa:** Lk. 23:41 na'a gucha alunghei pa chun Jesu chu imacha bolset na neilou ahi tin aphonhdoh'e.

**v. Judas Iscariot,** Jesu seijui, ama johdoh'a pangpa chun Jesu ajohdoh nunga alung ahungkikhel chun, "themmo na neilou thisan kaso jeh'in kachonse tai" ati (Mtt. 27:4).

**vi. Rome sepai jalamkaipa:** Lk. 23:47 na'a hiche pa hi michonpha tahbeh ahi ati.

#### 4. CHRISTA CHONSETNA NEILOU AHINA CHUNGA KINELNA

**i. Kimkhatnin chonset lou hi thil hithei lou ahi atiuve.** Bible dungjuijin mihem chu chonse ahin, chonsetna neilou kiti chu ahithe' lou ahi atiuve. Ahin Christa vang chonsetna neilou ahi.

**ii.** Kimkhatnin lhepna ato jehchun chonsetna lhamaithei (susceptible) ahi atiuve. Lhep patepma umhi chonset ahipoi, lheplhah'a umjoh chu chonset ahi. Jesu chu satan'in lheplhah dinga agalhep ahin, ahin Jesu hi'a chun analha poi.

**iii.** Kimkhatnin Mtt. 4;1-11 na'a Jesu lhep patepma aumkhu, Jesu chu chamkim ahileh lhepna jong khu jou/atah hilou hiding ahi atiuve. Adam le Eve jongchu chamkimma anakisema, chonsetna neilou anahi lhone. Amani chu lhepmin anaum lhonin, lheplhah anahi lhonin ahi. Hiche'in avetsah chu lhepna hi achamkim ho chung a jong lhung ahi.

**iv.** Chonsetna lampanga kaina/on'na (bias) dinga lungput leh lhahsamna aumjep louleh chonsetna chu mihem sunga iti lutthei ham? Adam le Eve chu Pathen tobang hiding le khantou ding pilhin ding lungtup aneihon jeh'a chu chonse anahi lhone. Lhepna chu atahbeh ahin chuleh hi'a chu lhahon ahi. Jesu jong chu mihem ahijala (Pathen ahina jeh hilou) anopleh chonsetna chu lhathei ahi. Ahin Christa vang hiche lhepna'a chu lhahding nomlouvin lhepna chung a galjona aneijoi.

## **5. CHRISTA CHONSET NEILOU AHI NOPLOU CHU**

**i.** Christa Calvary'a athi chu amachonset jeh'a thi ahin, eiho eiho chonsetna'a ium jingnalai juve tina ahi.

**ii.** Jesu chu chonsetna nei ahileh Pathen chapa hithei louding, mihem chapajong hilouding, lhatdampu jong hilouding ahi.

**iii.** Christa chu chonse ahileh Calvary'a chu pumgo thilto'a kitoh thei louding ahi.

**iv.** Christa chu chonsetna nei ahileh Houbung jonghi songchung a hilou neldi chung a kisa ahin, chomlouva chim lhapai ding ahi.

**v.** Christa chonsetna neilou ahi ti noplou hi Huhhingpu leh huhhingna seilepna ahi.

## **6. CHRISTA CHONSTNA NEILOU AHIDAN JATNI'A AKIPHONDOH**

**i. Negative:** Chonsetna abollou, agellou, angaito lou

**ii. Positive:** Pathen lungdei le aphalam ngen abol, ase, agel.

Thenna kiti hi : chonphatna ngailutding leh chonset na hotboding tina hi.

## **7. CHRISTA CHONSETNA NEILOU AHI APHATCHOMNA**

**i.** Chonset neilou ahijeh'a chu Pathen mihemte henga chamkimtah'a akiphondohna hithei ahi.

**ii.** Mihem la hingala, ahi'a chonsetna neilou ahihin Pathen le mihem kah'a palai chamkim ahisah'in ahi. Ajehchu amatah jong leiset mihem khatna hungpenga mihem ten ato jouse ahungto, genthei, hahsat le lhepna jouse jong asatah'a ahungto ahi.

**iii.** Mihem ahi jal leh chonset na neilou ahi jala calvary'a chu chonset jeh'a pumgo thilto'a kitoh thei ahi.

iv. Chonsetna neilou ahi jeh'a chu ivetjui dingu chamkim pen le bulhing hija ahi (1 Pet. 2:21,22).

v. Chonset na neilou ahijeh'a chu vangam lampi chu eihon peh'u ahi.

## **BUNG – 7**

### **CHRISTA AHINA (Character) HO**

#### **1. JESU CHRISTA ATHENG AHI**

Christa chonsetna neilou ahi'a isei taove.

#### **2. CHRISTAN NGAILUTNA ANEJE**

Christa ngailutna hi lamni'in akilah'in ahi: Pathen angailutna le Mihem angailutna.

- i. Jn. 14:31, Pathen angailutna. Pathen angailutna chu athu amanin avetsah'in aphochenin ahi (Jn. 6:38; 14:31b; 17:4; 19:30).
- ii. Houbung angailun ahi (Eph. 5:25).
- iii. Ama' ho chu lamdang tah'in atumbek'in angailun ahi (Jn. 13:1).
- iv. Christan michonse teho angailui (Lk. 19:10; Mtt. 9:13; 5:44; Lk. 23:34).
- v. Jesun chapang ho angailui (Mk. 10:13-16).
- vi. Angailutna chu eiho ihaothei na dinguva vaicha tah ahung hi'a chun avetsah'in, atahlangin ahi (2 Cor. 8:9 (RV)),
- vii. Angailutna kilah napen chu eiho khela kiphaltah'a ahung thi chu ahi (Jn. 15:13).
- viii. Jesun eingailutnao chu niseh'a tunigeija eikithopi'uva, ei hinghoi jinguvahin atahlangin ahi (Mtt. 6:33).

#### **3. JESUN LHAGAO ANGAILUI.**

- i. Ama kelngoiching pha bangin Judate lah ahin gentilete lah ahin, kelngoi mangsa ho holin ahungin ahi (Jn. 10:16).
- ii. Aman mijouse angailun, mijouse dingin athi (Jn. 3:16).
- iii. Anatoh (ministry) hi changval lhagao hinna ding le mi jouse khat khatna jona ding ahi. Adeh'in Gospel John abulam chu ivetleh changval to kimaiton akihoulime.
  - a. Andrew le aloipa toh (Jn. 1:37-40).
  - b. Peter toh (1:42).
  - c. Philip toh (1:43).
  - d. Nathanael to (1:47).
  - e. Nicodemus toh (bung 3).
  - f. Samaria numeinu toh (bung 4).
  - g. Apenna pat micho pa toh (bung 9).
- iv. Kelngoi mangsa khat amuteng akipah'e ( Lk. 15:5-6, 24).
- v. Chuleh lhagaokhat touvin apaidoh teng asulung na jin ahi (Lk. 19:41,42).

#### **4. JESU CHRISTA CHU MIHEPI/MIKHOTO HAT AHI**

- i. Jesu aka a kon chun mi akhoto akimui (Jn. 11:35).
- ii. Amihepina le khotona hin mijouse ahopme (Mk. 6:34).
- iii. Amihepi le khotna chun mihem ho tahsa ngaichat na jong ahoptha'e (Jn. 6:5).
- iv. Ami hepi na chun mitcho pa chu achamlouva kho amusah ahi (Jn. 9:1-38).

- v. Aman lhagaoboh vopho chu akhotoi (Mk. 9:22,25; Mk. 5:1-13; Lk. 4:41).
- vi. Tiphah ho jong ahepi'e (Mk. 1:40-41; Lk. 5:12-15).

#### 5. HEBREW 5:7 NA'A JESU TAONA THANEI TAH'A AKISEINA BANA GOSPEL 4 HOSUNG HI IVETLEH JESU TAONA AVELIN AKIMUN AHI.

- i. Jan khovah helin ataovin ahi (Lk. 6:12; 9:18; Mk. 1:35).
- ii. Ana toh apatding kon, Baptism, Lheppatep atoding kon ho'a ataojin ahi (Lk. 3:21; Jn. 6:15).
- iii. Aman lhangphong tah'in Pa henga thilkidang bolna dingin ataoji'e (Mtt. 14:19; Jn. 11:41-42).
- iv. Leisetna anatoh kichai ding geijin Pa henga taona aneije (Lk. 23:46).
- v. Aman achanga munthip khat ahilouleh molpang ho'a taoding adeije (Mt.14:13)
- vi. Kahlah lah leh asejuite tojong ataokhom ji'e (Lk. 9:28; Lk. 22:39-46).
- vii. Ama changval dingin ataoji'e: Peter dingin (Lk. 2:31,32); ama'a hoding (Jn.17:9,20).
- viii. Pathen lung lama kipedoh'in taona aneije (Mtt. 26:42 - Gethsemane'a)
- ix. Aman asejuite chu tao dingdan ahile (Mtt. 6:9-13).
- x. Taona jala lhepna ajo, thil kidang abol, thina apeldoh'a Pathen achoiat ahi.

#### 6. JESU CHRISTA CHU ALUNGNENGIN AHI

Jesu amatah lungnengin akiseijin ahi. Mtt. 11:29 na'a Kanamkol jon hi la'un lang keija kijillun, ajehchu kei lungneng tah... kahi ati" (cf. Mtt. 12:20).

7. CHRISTA CHU AKINEOSAH'IN AHI. Alungneng goh hilouvin Jesu chu akineosah'in ahi, Mtt. 11:29.

- i. Christan ama loupina ding hol louvin Pathen loup nading aholjon ahi (Jn. 8:50). Aman japi seiphat ding agelpon, kiletsahding jong angaitopoi.
- ii. Akineosah jal chun kaidong holeh michonse ho toh jong akiloi theije (Lk. 15:1,2).
- iii. Akineosah jalchun achung thu ichana akiheh set jengin jong apaopoh poi (Isai.53:7; 1 Pet.2:23).
- iv. Akineosahna chu asejui ho keng asopmin avetsah'e (Jn. 13:4,5).
- v. Akineosah jalchun cross'a thina chan geijin thu anunge (Phi. 2:8).

## **BUNG – 8**

### **JESU CHRISTA THUHIL**

#### 1. HUHHING NA CHUNG CHANGA THUHIL

- i. Nicodimus to akihoulim nalhona napenthah/thahpen/avela penkit angaije ati (Jn.3:1-15).
- ii. Samaria numeinu to akihoulimin, amanu chu Ama, hintwi ngaichatnan adangchah sah'e (John 4)
- iii. John 6 na'a Ama changlah dihtah'in akiphongdoh'in, lhagao gilkel dihtahho oivana ahi ati.
- iv. Luke 7:47,48 na'a Aman chonset ngaidam na tha anei aseije.
- v. John 10 na'a kelngoi chingpha thu aseina'a Ama bou chu huhhingna lampi ahi ati.
- vi. Matthew 11:28-30 na'a, Jesun tonggim te leh pohgih te chu ahenga hunga huhhingna changding le lhagao choldona mudingin akouvin ahi.
- vii. Luke 14:16-24 na'a hiche kouna chu mijouse, lamlen leh daipamma ho jouse, mivaicha, migenthe le khomulou ho ahopmin ahi.

viii. Huhhing na dinga ngailutna lenpen vetsahna chu Chapa vahmangpa akinungsan kit chu ahi (Lk. 15)

Jesu bouchu huhhing channa dinga alampi leh, vangam lutna dinga alampi avetsahna ahi

## 2. NITIN CHRISTIAN HINKHO KIMANDING CHUNG CHANGA JESU THUHIL

i. Matthew 5:33-48 na'a: a) Kihahsel louding, b) ingeiphe langkhat bengka chu alangkhatjong dopehding, c) Melma ngailut dingin ahile.

ii. Thilpeh chungchanga Mtt. 6:1-4; 19-20: a) Guhthima bolding, b) Tonsotna dinga gou kikhol ihuive ati.

iii. Taona chungchanga: Lk. 11:1-13; Jn. 14:13,14; 16:23,24; Mtt. 6:5-13: a) Guhthima taoding, b) Tantih neilouva taoding, c) Ijakai jouse'a dinga taoding.

iv. Ngaidam chungchanga Mtt. 5:23,24; 6:14,15 na'a: aman eingaidam theina dinguva eihon midang ingaidam masat dinguin aseije.

v. Jesun an angol jin, chuleh an ngoldingin hiljong ahilin: Mtt. 6:16-18; Lk. 4:2 'a lhepna'a lhahlouna dinga bolding ahile.

vi. Tahsa thil akhoh le apoimo ho chu imu theina dinguin: amasa'a Pathen lenggam le chonphatna ihol masat dinguin eihillui (Mtt. 6:25-34).

vii. Christa chu Pakai ahiti'a lhangphonga phongdoh dinghi angaikhoh ahi tin Jesun ahilin ahi. (Mtt. 10:32,33; Jn. 9:38).

viii. Alunghei ho chu amasa'a inlama kile kitna asopi ho henga gahettoh sah dingin ahile (Mk. 5:19).

ix. Tahsan ho lamhilding, amapuiding, hatsah dingle thahatna pe dinga Lhagaotheng angaikhoh dan ahile (Jn. 14:16-26).

x. Jesun asuijui holeh atahsan ho chu nopsah na mudingin aseipon, ahin thohhahsa le gimbolna ato laitah'u leh aphatcha kithopi ding le lungsetna chan dingjoh in aseije (John. 16:1-6; Lk. 12:11,12).

## 3. PHARISEE HOLEH THUHIL DIHLOU HO CHUNGCHANGA JESU THUHIL

Amaho miphalhem holeh thuhil dihloou ho chungchang thu'a hin Jesun lhangphong tah'in demna anei jin ahi.

i. Mtt. 23:13-36 na'a 8 veijen Pharisee holeh danthu hilho chu ada nahuive, mitcho lamhil le mingol tin aseijin ahi (13, 14, 15, 16, 23, 25, 27, 29).

ii. Jesun amaho chu apau diabol chate ahui ve ati (Jn. 8:44).

iii. Jesun amaho themgao lhem ho chu 'si'al kelngoi von silah' tin aseijin ahi (Mtt. 7:15-20).

iv. Jesun hiche ho'a kon kicheh theidingin ahillin ahi (Mtt. 23:15).

## 4. VANGAM LE DAMMUN CHUNGCHANGA JESU THUHIL

Pakai Jesun dammun chu tonsotna gotna channa mun ahi tin 70 vei lang gospel sunga aseije. Luke 16:19-31, Mark 9:42-48 na'a dammun agimnei dan thengtah'in aseijin, hiche'a chu lutlouna tei dingin gihna jong anei je (cf. Mtt. 25:41). Alangkhatna Indan chungnunga kihoulimna'a Jesun ache'a eiho ding mun agasem ding, eiho jong hiche'a chenga dinga eihung puidiu thu jong aseijin, hichu

vangam aseina ahi (Jn. 14:1-3). Jesun vangam chu Pathen to chenkhomna in ahi tin aseijin (Mtt. 6:9; Lk. 11:2). Jesu chu leisetna cha tamtah vangamma puilut dinga hunga ahi (Heb. 2:10).

## 5. GA NEIDING CHUNG CHANGA JESU THUHIL

Jesun indan chungnunga ahoulimna'a athupi khat kitchu lengpi lei leh abahho thu ahi, Amachu lengpi gui ahin, ama'a umma haga'a ga dingin aseijin ahi (Jn. 15:1-17). Luke 13:6-9 na'a theichang phung galou thulem aseina'a agalouho chu satlhah'a, suhmanga, meilhum sunga selut dingin aseijin ahi. Chuleh Matthew 7:16-20 'a ga'a konna chu ihinao kihedoh'a ahi ati. Matthew 13:1-23 na'a muchi thepa thulemin avetsah chu Christian te jouse hi aga ding'a adei vetsah na ahi. Luke 6:43-46 dungjuija Christian techun Lhagaoga sepdoh'a lhagao mangthai amahenga ilhut diuchu ikinu ahi.

## BUNG – 9 CHRISTA THUPEH HO

1. **Penthah (new birth):** Penthah hi lhagaotheng natoh lamdang tah ahi (Jn. 3:7). Mihem khatchu apenthah teng vanna amin kijihlut, vangama chan aneiding ahi (Lk. 10:20). Ga kicheh tah neina dinga chu Penthah na nei ngai ahi (Mtt. 12:33).

2. **Lhagaotheng chanding:** Christian jouse chu lhagaotheng changding chuleh lhagaotheng chun achunga tha aneidinga thupeh ahi (Jn. 20:22; Lk. 24:49).

3. **Jesu nungjuiding:** Tahsan jouse chun lamdang umlou Jesu nung chu jui dinga thupeh ahi, (Jn. 12:26; Lk. 9:23; Jn. 21:22; Lk. 5:27).

4. **Taoding:** Christian hinkho chu taona'a tahlat ngai ahin, taojing dinga thupeh ahi (Lk.21:36; 22:40; 10:2; 6:28).

5. **Tahsan (Faith):** Tahsan (believers) hochu Pathen thaneitah atahsan jeh uva thanei hui ahin, ithanei theina dinguva tahsan ngai ahi (Mk. 11:22; Jn. 20:27; Mtt. 14:27).

6. **Bible simjingding:** Hiche hi tahsante jousen niseh'a abol dingu chu ahi (Jn. 5:39; Jn. 15:20).

7. **Ivah vahdoh sahding:** Christian jousen avah chu havah'a avahsah ding ahi (Mtt. 5:16; Jn. 15:16; Mk. 5:19).

8. **Pathen ngailut pending:** Pathen chu ngailut ahin, aman angailut banga amasa pena Pathen ngailut ding ahi (Mk. 12:30; Mt.4:10).

9. **Iheng ikom ngailutding:** Inu ipa, iheng ikom, sopiho chungu imopohnao chu angaichatnu bulhit peh ding chule ngailutding hi ahi (Mtt. 19:19; Lk. 6:31).

10. **Phalthem louding:** Phalthem na le mipalthemho'a kon kikang seding (Lk. 12:1; Mtt. 23:2,3).

11. **Kineosah ding:** Christa banga lungneng tah'a kineosahding (Mtt.11:29; Mk.10:44).

12. **Ngailut ding:** Isopi ngailutding, ngaidam kichanto ding, themmo kichanto louding (Jn. 15:12; Mtt.18:10; 5:24; Lk. 17:4; 6:37).



13. **Chamkim ding:** Jesun dinmun nemcha'a dinding adeipoi, chamkim dinga eideiju ahi (Mtt. 5:48; Lk. 6:36).
14. **Kitah ding:** Thi channa kitah ding (Mtt. 24:13).
15. **Lunghei (repentance):** Pathen lenggam luttheina dinga lunghei ding (Mtt. 4:17; cf.Lk. 13:24; Mt. 6:33).
16. **Chihding:** Mihem chihna hilou Pathen'a kon chihna (Mt.10:16; Mtt. 7:6).
17. **Khat le khat kingailutding, kithuman toding ahi** (Mk. 12:17).
18. **Kigosa dema umding:** Ahungkit na dinga kigosadema umding (Lk. 12:40).
19. **Tahsan (belief):** Kipana thupha tahsan ding (Mk. 1:15), Pa leh chapa ani'a tahsan ding ahi (Jn. 14:1; cf. Jn. 6:29).
20. **Kipana thupha lhangsap ding** (Mk. 16:15; Lk. 24:47; Jn. 21:15,16,17).

## **BUNG – 10**

### **JESU THILKIDANG BOL**

Thilkidang tihin mihem thilboltheina kalvalla thilkhat bol/thilkhat soh atina ahi. Tekahnan theiga khu noilama hungkhe louvin chunglam joh'a khetou leh hichu thilkidang ahi. Hitobanga Jesun mihem boltheina khellam peh leh leiset dan chunglam peh'a thil abolho chu thilkidang kiti ahi.

#### 1. JESU THILKIDANG BOL AJATCHOM DAN (Uniqueness)

Christa thilkidang bolho chu Pathen ahina photchetna dingleh athusei kithopi dinga abolji ahi (cf. Jn. 2:11). Jesu thilkidang boljal chun asejuihon atahsan uve. Themgao ho (Mose, Aaron, Elijah, Peter, Paul) hochun thilkidang abolu chu amaho thaneina hilou, Pathen thalhenga abolu ahin, Jesun vang athilkidang bolho hi amatah thaneina'a abol ahin, Pathen ahina atahlah na ahi. Jesun thilkidang 35-40 lam anabole ti golpela akimun ahi. Ahin Jesun thilkidang hi ama kisuh lunglhaina dingin amangpoi (Lk. 4:3,4).

#### 2. JESU THILKIDANG BOLLIN AHOPLET DAN.

- i. Thilsem jouse chung: huipi leh twipi kinong aphothip (Mtt. 8:26-27).
- ii. Thilha/lhagaoboh ho chung (Mk. 5:12-13; Mtt. 8:28-32; 9:32,33; 15:22-28; 17:14-18; Mk. 1:23-27).
- iii. Natna ho chung: Mtt. 8:13; 9:6; Jn. 5:9; Mtt. 12:13; Lk. 13:12, Mtt. 9:22; Lk. 14:2; Mtt. 8:15; Mtt. 9:33; John. 9:1-38; Mtt. 11:5; Mtt.8:3; Lk.17:19 ho isim leh natna jatchomchek chung athaneina akimun ahi.
- iv. Thina chung: Lazarus (Jn. 11:43,44); Jairus chanu (Mtt. 9:18-26); Nain kho'a meithainu chapa (Lk. 7:12-15).
- v. Thil dang dang chung: Twi lengpitwi sosah (Jn. 2:1-11); Mi 5000 avahva (Jn. 6:1-14); twi chung lam ajot (Jn. 6:15-21); Mi 4000 avahva (Mtt.15:32-39); Theichang phung agaosapma agot (Mtt. 21:18-22); Nga oipoh sunga sum kimu (Mtt.17:17); Nga tampi amatsah (Lk. 5:1-11; Jn. 21:6).

vi. Amatah athodoh kitchu Jesu thilkidang bol chungnung pen ahi (1 Cor. 15:4; Rom.1:4).

### 3. JESU THILKIDANG BOLHO PACHAT LOM AHIDAN:

i. Jesu thilkidang bolho hi Bible toh kibehden chet atahbeh ahin lhekhen thei ahipoi. Hiche hohi milung suthou, suna dingle Jesu choisangna dinga kijih maimai ahipoi.

ii. Jesu thilkidang bolhohi dihtah ahin, mitampi mit mu changtah'a abol ngen ahi.

iii. Kidangtah'a suhdam hi louthem holeh scientice ho khatchan abolthei louvangun adihmona/ahimona amudeh pouvin ahi. Jesu thilkidang bolhi lamdangtah khatseh ahi.

iv. Jesun thilkidang hohi chonhoilou le adihlou lama mancha dinga abol aumpon, adih leh apha ding ngen na abol ahi. John Baptist'in Messiah ahi hilou adohchun seitho louvin thilkidang bolin aphot chetna apen ahi (Mtt. 11:3-6).

v. Jesu thilkidang bol hilchet got hi Christa athaneina le Pathen ahina kisuneo go ahi. Thilkidang hohi adihtah ngen ahin, Pathen lekhabu'a kimu thuho jousehi kipah tah'a atah ahitia lahding ahi.

### 4. JESU THILKIDANG BOL KIDEMNA (Objection)

i. Kimkhatnin Jesu thilkidang bol hohi ngolhoi tah'in ahilchen go'un; tekahnan twi chung lam ajot hi twithuh loulah'a che ahi; mi 5000/4000 avah vana'a chu chapangpan achanglhah akilah doh'a Jesu apeh'a chu mijousen achanglhah cheh'u akilahdoh uva aneh'u ahi; athi atho ho chu athi tah tah hilou a'imu/athimil ahibouve atiuve.

ii. Materialism (tahsalam ngaisang leh lhagaolam khohsah lou) hon Pathen thanei na apai lhaovin, tahsa thaneina bou apomun, thilkidang asangnom pouve.

iii. Panthiest (thiljouse Pathen ahin, Pathenhi thiljouse ahi tiho) law of nature (thil umdan chena lhongpi) bou atahsanun, thilkidang asangnompouve.

iv. Agnoticism (Mitna mulou tahsanglouho) thilkidang asangpouve. Ajeh chu amahon thilkidang hung konna pa atahsan loujeh'u ahi.

v. Naturalist hon thiljouse angaina dola che ahi ti atahsanun, thil kidang hi angaina'a chenna lhongpi toh akitohton, angaina dol ahipoi tin atahsang pouve.

vi. Philosophy hon thilkidang hi lunggel alhangpi'a achejom na' asutangan santhei ahipoi atiuve.

vii. Optimist hon thiljouse hi ahoina pena um ahin, thilkidang angaikhoh poi atiuve.

viii. Adang tampin thilkidang hi aphotchetna aumpoi atiuvin atahsan nompouve.

### 5. JESU THILKIDANG BOLHO AMANTAMDAN:

i. Eiho dingin vang thilkidang hi Jesu Christa eihuhhingpu'u ahi vetsahna kichehtah ahi. Jesun ahina le Pathen ahina thilkidanga atahlange. Thilkidang hin mihem ahina chung amihina (superhuman) avetsah'e (2 Thess. 2:9).

ii. Anti-christ in athaneina hi satan'a kona akilah ahin, Christa in athanei na vang Pathen'a kon ahi.

iii. Thil kidanghin koima ahuhhing ding ahipoi (Jn. 12:37), ahin mihem khat chu tahsan nalama pui theina ding lampi joh ahi. Thilkidang hin tahsan ho atahsan nao asuhatnin ahi (Mtt. 8:22).

## BUNG – 11 CHRISTA THI

### 1. CHRISTA THI CHUNGCHANG THUHIL:

**i.** Themgao kamma kon kiseisa ahi: Isai. 53:8 mihing gamma kon kipaidoh ding; Dan. 9:26 Messiah kipaidoh ding; Zech. 13:7 Kelngoichingpa kivohchipding.

**ii.** Pathen'in athidinga anagelhah sa ahi. Isai. 53:6 eiho chonsetna achunga abuhlhah ahi, 53:10 jepma aumchun Pathen alunglhai sah'e (cf. Acts 2:23).

**iii.** Athi lo anajeh (Meaning):

**a. Kithoidamna** (Atonement): Old Testament Phatlaija kimangcha thucheng ahin, chonsetna khukhum (cover) nan 77 vei akimange. NT 'a khatvei bou akimangin ahi (Rom5:11). Hiche hin khukhum ahilouleh suhbei atina ahin, OT phatlaija chu chonset kithoidamna le khukhumna dinga kumtina ganthisana kilhatna anaboljiu ahi. Tu NT phatlaija vanghi Christaa Thisana kilhatdohna ahin, tonsot geija dinga themchan sahna ahitai (Heb. 10:4; 9:26-28; Rom. 5:11)

**b. Lunglhaihahna** (propitiation): Christa chu eiho thensona ahi (1 Jn. 2:2), Pathen'in achapa chu eiho chonset thensona'a ahinsol ahi (1 Jn. 4:10). Dan (OT) chun choset jeh'a thina angeh ahin, hijeh'a chu kilhaina, ganthisan chu hepi taouna chung a thekhum ding (Lev. 16:14; Ex. 25:22;) Hiche chu Pathen'in amutengle alunglhai sah ding anahi. Hiche banga hi eiho chonset jala cross'a Christa thi chun Pathen lunghana chu alungdamsah'a, alunglhaihah ahi (Rom. 3:25-26; Eph. 2:3; Rom. 5:10-11).

**c. Kichamna** (Reconciliation): Mihemte chonsetna jeh'a Pathen toh kimelmahna, kidouna sohdoh ahin, Hichu Christa thina chun Pathen lunghana chu alahmang kichamna asemboh'a asuhcham lhon ahitai (Acts. 10:43; 2 Cor. 5:18,19; Eph. 2:14-16).

**d. Thalhenga thi** (Substitutionary): Chonsetna jeh'a mihemte chu thiding, mangthah dingu ahin, mihemte khela Christa chonset helou helpa chu hungthi ahi (Rom. 5:10; Isai. 53:4-6; Jn. 10:11; 1 Pet. 3:28).

**e. Kilhatdohna** (Redemption): Pathen douna'a chonset jeh'a satan khutna sohchangsa chu Christa'in ahinna apah'a athisana achohdoh kit tina ahi (Rom. 3:24; Gal. 3:13; eph. 1:7; I Pet.1:18,19; I Cor. 6:19-20).

**f. Chohdon/Lhatdoh** (Ransom). Soh khat ahiloule songkul tangkhat lhatdohna'a kipe aman (price) seinah ahi. Huhdohna/chohdohna dinga man kipe hi satan henga kipe ahipoi. Lhatdohna manhi Akitahna (justice) le chonset chung a lunghana suhlungkim/lunglhaihah (satisfy) nadinga Pathen henga kipe ahijoi (Jn. 19:18).

**iv.** Athidan:

**a.** Cross'a kikhenbeh ahi (Mtt. 27:35; Mk. 15:24; Lk. 23:33).

**b.** Thulhun luija vetsah'na anaumsa – kidomsang ding ahi akiti (Num. 21:18; Jn. 3:14).

**c.** Jachat umtah le thimelse tah ahi (Heb. 12:2).

**d.** Themmo channa thina ahi (Gal. 3:13).

**v.** Athi chu amacham tah'a kiphah thenga thi ahi (voluntary): Koiman hunam'a (force) asoljong hilou, ama chamtah'a kiphah tah'a hungthi ahi (Jn. 10:18).

## **BUNG – 12**

### **CHRISTA THOKITNA**

Christa thokitna hi Christiane dinga itahsanna kingapna bulpi ahin, NT sung sehseh'a 104 vei akiseije. Christianity hi sakho khatseh, ahingjingin aphudoh chu ahi. Sakho dangho vang aphudohpao le ahoupao chu athisa ngen ahi.

#### **1. CHRISTA THOKITNA APOIMO DAN:**

- i. Themgaohon anaseimasa taovin ahi (Ps. 16:10).
- ii. Amatah'in jong anasei masat ahi (Mtt.16:21).
- iii. Solchah hon kipana thupha'a aneiju ahaseipenu chu Christa thokitna hi ahi (Acts. 1:21-22; 2:24; 4:33; 13:35-38; 10:41).
- iv. Christa thokitna hi aumlouva ahileh Christianho tahsan hi moh thu hiding ahi (1 Cor. 15:14, 17-18).
- v. Paul in ahinkho'a hetdinga atop sangpen chu Christa thokitna thaneina chu ahi (Phil. 3:10; Eph. 1:19-20).
- vi. Christa amatah chu thokitna le hinna ahi (Jn. 11:25-26).

#### **2. JESU THOKITNA PHOTCHETNA HO:**

i. **Lhan agohkeuva aum** (Mtt. 28:6; Lk. 24:3). Lhan sunga Jesu long ana'umtah louhi jatni jeh ahin, 1) akigudoh ahilouleh 2)Athoudoh hiding ahi. Christa longchu akigumang hilouva athoudoh joh ahi.

ii. **Vantil tenin ase**i (Mtt. 28:5-6; Lk. 24:5-7). Athodoh jingkah chun vantil tenin numei ho jah'a "Athiho lah'a ibolla ahing naholuham? Ama hikoma aumtapoi, aman Galilee'a aumlaija aseima bangin..." ati lhonin, Lhan agohkeu ahina bana vantil tenin Jesu thodoh thu aheth tohsah lhone.

iii. **Athodoh jouva miho henga akilah** leh aki houlimuva kon:

- a. Mary Magdalene henga lhan munna (Mk. 16:9; Jn. 20:11-18).
- b. Lampi'a numei ho henga (Mtt. 28:9,10).
- c. Peter henga (Lk. 24:34).
- d. Thomas jaolouva solchah 10 ho henga (Lk. 24:36-43; Mk. 16:14; Jn. 20:19-25).
- e. Thomas jaona'a some khat henga (Jn. 26-31).
- f. Galilee dillen panga seijui 7 ho henga (Jn. 21:1-25).
- g. Mi 500 val henga, Galilee mol hidinga ginmo munna (1 Cor. 15:6 cf. Mtt. 28:16).
- h. Jacob henga (1 Cor. 15:7).
- i. Vanna akal ding konna Solchah ho henga (Acts. 1;3-11).
- j. Van akal jouva solchah Paul henga (1 Cor. 15:8 cf. Acts. 9).

iv. Solchah/Seijui ho hangsan dan. Jesu athi'a athodoh masang chun solchahho leh anungjuiho chu kicha le tijatna dimsetna kisel den jing jengu ahi. Ahin Jesu atho'a ahenguva akilah'a Lhagao Theng achanu kallhah chun Jesu athou monge ti lhagsap nan gentheina tin cheng leh thina atoh soh keijun ahi.

#### **3. JESU THODOH CHUNG CHANGA THUHIL DIHLOU:**

- i. **Fraud Theory:** Jou ahi, thu chavai ahi, adih lou ahi tiho.

ii. **Swoon theory:** Jesu chu thi tabbeh hilou, athi mil maimai; lhandap sunga chu aumle leidap min ahinchop phetna hung hingkit ahi. Chuti ahileh iti danna lhansunga kon hungpot dohthei ahidem? Alou kinu chu poison hija iti hing kit theiham?

iii. **Hallucination Theory:** Seijuiho chun Jesu amu nomu chuleh alunguva thoukit ding ahiti'a agel gel jeh'uva alungmit uva amu'a ahin, atah hilou ahi. Chuti ahitah sangin Biblein solchah/seijui hon Jesu amu'u chun atahsang pouvin, Thomas dehdeh chun atham loule tahsang ponge ati. Seijui hon atahsanlou jeh'un jong Jesun apho lo'ui (Lk. 24:25), Chuleh iti danna mi 500 jenin thilkhat chu kibang'a alungmit uva amukhom theiju hintem?

iv. **Ghost theory:** Seijui ho chun Jesu tahtah hilou alha joh amu'u ahi. Ahin lha/thilha'in phe le vou aneipon, nejong anepon, donjong adonpon, hinlah Jesun aneijin, anen, adonin ahi (Lk. 24:39,43).

v. **Myth theory:** Thusim dihluu, akhang khanga hung kiseison thusim maimai ahi. Bible hi Pathen'in ahaikhum thudih le thutah ngen kisutna ahi.

#### 4. **ATHODOH KIT NUNGA ATAHSA:**

- i. Phe le vou, gu le chang aneije (Lk. 24:39).
- ii. Tahsa loupina vou le tahsapum (glorified body) aneije (Phil. 3:21).
- iii. Monmang theilou tah/thitheilou tahsa aneije (Rom. 6:9).
- iv. Lhagao tahsa (spiritual body) aneije (1 Cor. 15:44).
- v. Tahsa song leh leibang palthei aneije (Jn. 20:19).

#### 5. **CHRISTA ITI THODOH KIT HAM?**

- i. Pathen (Pa) thaneina jala thoudoh ahi (Acts. 2:23,24; 3:15; 5:20).
- ii. Christa amatah thaneina'a thodoh ahi (Jn. 2:19; 10:18).
- iii. Lhagao theng thaneina'a thoudoh ahi (1 Pet. 3:18).

#### 6. **ATHODOH KIT GA HO:**

- i. Pathen aum monge ti aphonhdoh'in ahi. Ajeh chu Pathen'in athahatnin thina'a konin akaithou tai (Acts. 2:24; 3:15; 10:40; 13:30; Col. 2:12).
- ii. Christa Pathen chapa ahina akiphong doh'in ahi (Rom. 1:4).
- iii. Huhhingna natoh hi jo ahitai ti aphonhdoh'e. Cross'a athichu lhatdamna natoh ajona ahin, athodoh chun aphotchet ahi.
- iv. Atahsan ho tahsan na aphut detne (1Cor. 15:17-20).
- v. Mijouse thokitna ding photchetna ahi:
  - a. Michonpha ho tonsot hinna'a (1 Pet. 1:3,4).
  - b. Michonseho chu Pathen lunghan thutanna leh tonsot thina changdinga.
- vi. Ahung kitding photchetna ahi.
- vii. Christa thokitna hin atahsanho jouse ama chang cheh kithemput theina asosah'in ahi (Eph. 1:20-22; 1 Tim. 2:5-6; Eph. 2:18; Heb. 10:19-23).

## **BUNG – 13**

### **CHRISTA VANNA AKAL TOU**

#### **1. VANNA AKALTOUDING KISEI MASAT:**

- i. Nangma chunglam ah nakal touvin, sohchang tampi napuitoutai (Ps. 68:18).
- ii. Pakaijin, Kapakai jeh'ah, namel mate nakeng chotpha'a kaneisah masangsen, kajet lamah toujingin (Ps. 110:1).
- iii. Aman, keima kache manga chuleh nahenguva kahung kit ding ahi ati (Jn. 14:28).

#### **2. NI 40 JOUVA AKALTOUNA JEH:**

- i. Athoudoh mongmonge ti photchetna ding; tahsan ho tahsana phudetna ding.
- ii. Christian tahsan chung a changa aseijuiho ahilchah theina ding.

#### **3. VANNA AKAL TOU JE**

- i. Kapa nangho pa, ka Pathen nangho Pathen koma kakal touve ati (Jn. 20:17).
- ii. Aseijuite mitmu changtah'in van lamah meiloma toltouvin aumin ahi (Acts. 1;9-11).

#### **4. VANNA AKALTOU LOU AKHOH DAN/JEH.**

- i. Van chu a'in ahin, leisetna anatoh ajo tolhona a'inn lama kile kit ahi (Jn. 14:28).
- ii. Themgao thuseiho guilhuna ding (Jn. 16)
- iii. Atahsan ho lhamonsah dinga lhagaotheng ahin solpeh theina ding (Jn. 16:7).
- iv. Atahsan hon ama tohban atohtheina dinguva vanna kal ahi (Jn. 14:12).
- v. Vannoi pumpi'a kipana thupha seiphonga aumtheina ding (Mtt. 28:19-20).
- vi. Vanna ichenna ding mun sema che ahi (Jn. 14:2,3).
- vii. Athodoh photchet ahi theina dinga.
- viii. Pathen loupi sah nading (Jn. 17:1).
- ix. Lengchapa/leng hiding leh huhhingpu hidinga (Acts. 5:31).

## **BUNG – 14**

### **TU TU'A CHRISTA NATOHHO**

Christan leisetna anatoh ding cheng atong jouvin vanna akaltou tai. Ahin hikoma jongchu laltouna'a touva moh umthim ahipoi.

1. Mitheng ho vanna eitaopeh jingun ahi (Heb. 7:27; 8:1-2).
2. Mithengte lhahsam panhu ngaiho apanhu jingin ahi (Heb. 4:16).
3. Mithengte lhepna tohho apanhu jingin ahi (Heb. 2:17-18).
4. Mithengte sukhelna nejja kisiho Pa henga seicham peh dingin apang jingin ahi (1 Jn. 1:9; 2:1).

**BUNG – 15**  
**CHRISTOLOGY CHUNG CHANGA SOLCHAH LEKHABU'A**  
**SOLCHAH HO THUHIL**

Solchah lekhabu hin Jesu leiset hinkho thusim lhomcha seije. Peter'in 2:2ff na'a "Nazareth Jesu, Pathen'in amanchah'a bolmo kidang, datmo umho abol le melchihna ho abola kon Pathen'in aphotchet ahi (2:22) atin, 'Amachu Lhagao Thengin thao anun, muntinna avahle avahlen thilpha abolle'e (10:30) ati. Ama chu athin athoukitnin (2:24), hichu solchah ho amaho tah aheto'h'a leh aphonhdoh'a ahiuve, ati.

Peter'in athu ngaiho chun Nazareth Jesu amihem hina hinkho chu aheth diuva angaito jeng jeh'in athusei lai lungpen le athupi pena agelchu Jesu chu Messiah le Pakai ahi ti'a anop dinggu chu ahi. Hijeh'a chu aman OT gaothusei guilhunna ahi ti'a aseiji ahi. Hicheto lhon chun aman, Christa akipehdoh (3:13; 4:27); athodoh/ahinkit (3:15), Pakai le christa ahi (2:36); ama'a konna bou huhhingna akimu dan (4:12), nikho khat teng athi ho leh ahingho jouse chungu thutan ahiding (10:42) aseije.

Solchah Peter chun athu ngaiho chun akikhenbeh Christa chu Pakai le Messiah ahi ti'a asan diuvin ahasei thupi pennin ahi.

**BUNG – 16**  
**CHRISTOLOGY CHUNGCHANGA PAUL THUHIL**  
**(Paul's Christology)**

**1. LOUPINA CHANGA CHRISTA CHU AKIKHENBEH CHRISTA CHU AHI.**

Paul Christology chu amatah'in Damascus lampi'a athilto, athoudoh Christa chu loupina ahenga akilah'a ahoupina kon ahi. Paul'in athoudoh Christa maija chu Pathen loupina aki mutheije atin ahi (2 Cor. 1 4:6). Christa chu mun le phat (time and space) jousen atuh joulou khel langpeh lhunga, Pathen lhagao thaneina chun aumpi'a, hijeh'a chu kidang tah'a tahsan ho'a chenga, tahsan ho jong ama'a hing thei ahi. Tahsan vanga – tichu eihon ingailut'uva, ama'a akinep'u le – Christa toh pumkhat (united) ihi theijuva, ama'a ihin thei dinggu ahi. "Christa'a hin" ahilouleh "Ama'a hin" ti thucheng hi alekhat thot ho'a 240 vei akimui (cf. Gal. 2:20; 2 Cor. 12:2; 5:17). Jesu hi mihem mai mai hitalou, amatah chu Lhagao ahin, A Lhagao ilungsunguva alut jala Pathen chu "Abba – Kapa" ti'a ikou theiju ahi (Eph. 2:18; Gal. 4:6).

Ahin hiche loupina changa Christa hi ana kikhenbeh pa mama chu ahi. Corinth mite henga "Jesu Christa thu thingpel chungu akikhet beh thu tailou thudang hehah beh'inge tia kangaito ahi (1 Cor. 2:8) ti'a anasei chu ahi. Jesu chu Lhagao maimai hilou, mihem dihtah, Adam nina ahi (1 Cor. 15:45) atin, a'ihmu ho lah'a aga masapen ahi ati (1 Cor. 15:29).

**2. ANAUM JING SA PATHEN CHAPA:**

Paul'in athilto chung chonna aloupi Christa chu Bethlehem'a anapenga Cross'a ana kikhenbeh'a anathipa chu ahi ti'a ahilchet goh hilouvin, hiche sanga gamlhan anungche ben, Christa chu Pathen chapa maimai hilou, ana um jingsa, Bethlehem'a apen masanga chu Pathen toh tonsotna ana umjing sa ahi ati. Paul dingin Pathen chapa thi hin Judate le Greek lengte title tobang maimai hilouvin;

Gospel jih ho bangin, aman jong Jesu le Pathen kiguijopna vetsahna joh'in amangin ahi. Hiche chu Romans lekhatot apatpatna'a vetsahna aneipaijin: Athuhil kipana thupha hi Pathen chapa, tahsa lamma dinga David phunga peng, ahi'a lhagao lamma – Lhagao Theng to kibahna lama, athodoh kitchu Pathen chapa ahi kiphon dohna ahi (1:2-4) tin aseije. 8:32 na'a Paul'in, 'Pathen'in achapa jeng jong khen dohlouva eiho dinga apehdong' tin aseijin; Col 1:13 a Christa chu Pathen'in angailut tah achapa (angailut chapa) ahi ati.

Paul tahsan dungjujin, Bethlehem masanga pat Christa chu leiset chungu natong thupi tah ahi. Tekah nan: OT thusimho, gamthipma Israel te vavilai – songpi'a kon twi putdoh, songpi Christa toh vetchep (1 Cor. 10:4). Hiche masanga jenga jong chun Thilsem jouse'a jong pan ala'in, chuleh ijakai hi amavanga um ahin, (1 Cor. 8:6) chuleh vannoi pumpi hi amavang leh ama dinga kitem ahi (Col. 1:16) ati.

Gospel 4 na'in Christa chu atila patna ana umjingsa ahi atin, ahin hetding chu, Paul'in hiche thu hi Gospel John kijih masang kum 30 ma'a anasei ahitai.

### 3. CHRISTA KISUHMEN LEH KIDOPSANG (Humiliation & Exaltation)

Paul thuhil thupi pen khat: ana umjingsa Pathen chapa chun mihem ho toh ahinkhom nadinga aloupi na ahin dalhah thu chu Phil. 2:5-7 na'a akimui. Aman ahina tahbeh Pathen ahina chu akoilhah'a... amaleh ama kisunem (emptied himself/kisubei) ja soh lima ahung uma, kineosah tah'a thu mangpuma thina – Cross a thina gei ahung change tin akisuhnem dan ahilchenne (vv. 5-8). Athi'a kon athokit jal leh vanna akal kit chun Pathen'in adom sangin – sang tah'a akoijin, min jouse sanga min chungnung pennin akoije (vv. 9-10).

Hiche tonsot Pathen chapa ama leh ama kinemsah (self emptying – Greek, *Kenosis*) hi tulai Christological thought (Christology lampanga lunggel) thupi tah leh phachom tah ahi. Paul'in aseina chu: mihem huhhing dinga leisetna ahung chun mihemte toh akibah louna dinga adaltan jouse ahin dalhan, mihem aneopen/anempen nin athoh'u gentheina jouse, thi chanin ahung thoh'in, hinkhothah eipeh theina dingun eiho khat bangin ahungin ahi, ati. Hiche hi Paul'in Christa mihem bulhing set ahina aseina ahin, Christa chu mihem bulhingset ahi atina ahi.

### 4. PATHEN AHINA CHAMKIM (Fulness of Godhead)

Paul'in Pa Pathen le chapa Christa achomchom/kibanglou ahina hi suhmang ding angaito poi. Christa chu Pa Pathen noiija (subordinate) aumna lampi (certain ways) jong aume. Noiija um (subordinate) tihi Latin thucheng, subordination – akigol dungjuija nunung (lower in order) tina ahi. Tekahnan, Chapa chu Pa'n ahin sola kon leisetna hunga ahin (Gal. 4:4), athodoh jouva chapa choisang chu Pathen ahi (Phil 2:9). 1 Cor. 3:22 na'a Paul in Christa chu Pathen ahi atin, 11:3 na'a Pathen chu Christa luchang ahi atin, chuto lhonchun Pathen, a Pathen hina chu Christa'a akimu'e. Christa'a chu Pathen hina chamkim chenga ahi (Col. 2:9). Pathen ahina jouse chu Christa'a akimun, Pathen hina pumpi chu Christa'a chenga ahi. Christa chu Pathen (divine) ahin, Christa chu Pathen (God) ahin, ahin Christa chu Pa Pathen ahipoi.

Paul'in Pa le Christa hi kibang ahi tin ahilpon, Chuleh Lhagao Thengle Christa jong kibangin ahilpon, achom chom ahi tin aseijoi (2 Cor. 13:14). Ahin Pathen chu Christa'a akiphong doh'e ti'a kipana thupha hon ahilutoh kibangin ahilin, amaho masangin anasun masajon ahi.



## BUNG – 17

### HEBREW LEKHATHOT'A CHRISTOLOGY

Hebrai lekhatot hi 60 AD vella Rome'a um Juda Christian ho dinga ana kithot ahi. Kon ajih ahi akiketlou vangin, asunpa hin Juda Christian ho dinga asut ahito lhonin OT'a kon hatah'a lasonin Christa chungu aguilhun dan ahilchenne.

#### 1. CHRIST LOUPINA (PATHEN AHINA)

Achang masapen 4 ho'a hin Christology sangtah akimui. Chapa vanga chu Pathen'in thilsem jouse asem ahin, Chapa, Thu/Logos le thaneina vanga vannoi hi venbitna um ahi. Chapa chun thilsem leh venbitna'a na atohjing to lhonin, thilsem thah mihemte huhhingna dinga jonghi amatah chun chonsetna suhthengna dinga na atoh ahi (v.3). Ama laltouna chungnung jetlama atouvin, vantil jouse sanga chungnungjo ahi (v. 4).

Heb. 7:3 na'a Christa Melchezedek to tekah ahina'a, Christa chu ana umjing, kipatna neilou ahi avetsah'e. 1:8 na'a Ps. 45:6-7'a Messiah chung changa la alahsonna'a "Chapa chungchang thu'a vang: Vo Pathen, nalaltouna chu tonsot tonsot geija umjing ahi" ati.,

Hijeh chun Hebrai lekhatot sunga hin Christa chu Pathen ahi tin hoitah'in aphotchena apen, Tonsotna umjing Pathen chapa, aloupi pen ahi tin ahilchenin ahi.

#### 2. CHRISTA MIHEM HINA

Asunpa mama hin Christa mihem ahina jong asune. Ama (Christa) chun eiho asopite ho ti'a kouding ajachat pipon (2:11); Aman eiho bangin patepna leh lhepna anatoh'in (2:17-18), hi'a chu analhah lou bou ahi (4:15). Gethsemani 'a amitlhi lon eigeldoh sah'un (5:8), Pathen chapa chu mihem ilhinlel nao hole gentheina hohi anatoh'in ahi.

## BUNG – 18

### JOHANNINE CHRISTOLOGY

Gospel John hi Paul lekhatot, Hebrew Lekhatot le Synoptic Gospel ho nung peh'a kisun – 90 AD jou nunga kisung ahi.

#### 1. ALOUPINA AHETTOHSAH (PATHEN AHINA)

John dingin Paul'in athoudoh Christa'a anamu loupina chu Nazareth Jesu'a umsa'in anamu'e (1:14). Abulpat patna Jesu hi Messiah, Christa hi'in aseijin (1:41) Chubani Christa loupina aphochenin ahi. John'in Christa hilchetna dingin Jesun ana thuseile anamanchah thucheng ho chu mangchan Christa natoh le ahina ho hilchetnan amange: Ama chu Vah ahi, Lampi ahi, Hinna ahi, Thutah ahi, Thu/Logos ahi. John in hiche ho ajih hi Christology thahbeh ahi'a kipana thupha hetbena dinga phachomtah'in apange.

**A. Jesun vannoi Vah kahi atin**, amabouvin apehthei Lhagao lama Vah chu photchetna dingin thilkidang; apenna pat mitchopa kho amusah thusim akiseijin ahi. Christa chu Lhagao lama imitchot naova kon imit hana dinguleh imu theilouna dinguva kon vah ahi tin aseije.

**B. Jesun Lampi chu kahi ati (14:6).** John Baptist ahin, houhil holeh adang dang hon mihem ho chu Pathen heng jotna lampi chu akopeh thei, aseipeh thei ahin, hinlah lampi chu amaho ahipouve. Lampi chu Christa ahin, ama'a um ho chu Pathen lam jonna ahiuve.

**C. Jesun Thutah chu kahi ati (14:6).** Ama chu tahbeh, aumtahbeh, ahinkho pumpi Pathen lungdei bang tah'a hing ahi. Chuleh aman hiche thutah chu anungjuiho ahom sonin (share), chamlhatna dihtah chu apei. Thutah chu heuvin natin, thutah chun nalha'ong diu ahi (8:32) anati.

**D. Jesun Hinna chu kahi ati (14:6).** Aman Lazarus chu athi'a kon athodoh sah'in; Samaria numeinu henga hintwi jin akiseijin (4:14); Aseijui ho henga Hinna changlhah'in akiseijin (6:48) akiseije. Vannoija ahung lona hi ama tahsan jouse tonsot hinna apeh theina ding ahi. Jesun hinna atiteng abeithei louding hinna aseina maimai ahipon (ahoptha vangin): Hinna atiteng, hinkho thah, hinkho dihtah, ahunglung ding khanga hinkho thah (life of the new age), thilsem thah – aman ahin poh lut – ho aseina ahi. Hiche hinkhothah hi aman anei banga inei theina dinguva ahinsol Pa Jesu vanga Pathen ihetnuva kon hiding ahi (17:3).

**E. Thu/Logos ahi.** Jesu chungchang ahilna'a John in amanchah lenpen chu Christa chu Thu/Logos (1:1) ahi atichu ahi.

Hiche thucheng hin Genesis'a Pathen thilsem na'a – Pathen'in aseije – kiti hiche thaneina'a kon thiljouse ahung umna Pathen Thu chu John'in mangcha'a Christa Pathen kama kon hungpotdoh Thu / Logos vanga chu vannoi hi um ahi atina ahi.

Anina'a, Thu hin OT 'a themgaoho thusei avetsah'e. Themgao ho chungga “Pathen *Thu*” ahung lhungin, chuteng amahon thu (message) chu aphondoh jiu ahi. Ahin hiche *Thu* chu ahunglhun teng thanei tah'a hung ahin, *Thu* kiseidoh maimai chu hilou, akiseidoh *Thu*'a chu Christa jao ahi (Isai. 55:11).

Athumna'a Thu hin Chihna avetsah'in, adeh'a OT chihna lekhabuho, adehsetna Prov. 8:22-31 na'a kisei avetsah'e. Hilaija hin Pathen chihna (Thu) Pathen'in ijakai asemnapa Thu akiseije.

Achainan Thu/Logos hi Greek philosophical/chihgilna thucheng ahi. Hiche hi adeh'a “Stioc School of thought” a kimang cha ahi. Stoic hon Vannoija hi reason ahiloule Logos in vai ahop ahin, hiche Logos/reason hi vannoi leiset hinsem leh achunga thaneina sangpen nei organizing principle ahi atiuve.

Hijeh'a chu John in Christa chu *Logos* ahi ati hin, Juda ho leh Greek ho dinga agoma ase, Nazareth Jesu chu *Logos* vannoi pumpi chungga thanei le asem, mihem tahsa kilah'a mihem hungsoh chu ahi atina ahi.

John Gospel hin Jesu leh Pathen kipum khatna aseijin, Pa le Chapa chu khat ahi (10:30) ati. “Kei nanga kaumin, nang keija naume (14:10)” atin, ani'a chu tahsan ho sunga hung chenga ahi (14:23). Ani'a chu ngailutna'a kikan gom (14:31; 15:9) anatoh na'a kipun khom ahi (5:17).

## 2. AMIHEM HINA AHETTOH SAH

A Pathen hina chung chonna amihem hina jong bulhingin aseije. Christa chu achol/alelin, adang chah'in, akapmin, akipah'e (4:6; 11:35; 17:13) ati. Ama chu Mihemin aseijin – akiseijin (4:29; 8:40) ahi. Kei le Pa khat kahi atina chung chonna Pa chu keisanga lenjo ahi (14:28) atin, hiche hin amihem hina leh Pathen'a akingaina aseina ahi. Chapa chun ama chama ima aboltheilou ahi (5:19; cf. 5:30;

8:26; 8:40). Mihem lim le tahsa'a hungpeng Christa chu Pathen noiya kipe lutna, Pathen'a kon amuho bou abola asehi ahi.

## BUNG – 19

### HOUBUNG MASA HO CHRISTOLOGY DIHLOUHO

*(False Christology of the ancient Church)*

#### 1. EBOINISM AND DOCETISM

Christa chu mihem ahina ha seival jeh'a Pathen ahina lhasam leova seidoh, ahilouleh Pathen ahina hasei val jeh'a mihem ahina lhasam leova seidoh ana umun, hiche amihem hina haseival ho chu Houbunghon Ebionism anasah'un, Pathen hina haseival ho chu docetism asah'un.

Ebionism kiti hi Hebrew thucheng '*ebionim*, 'mivaicha' kiti kumjabih masalaija Juda Christian loikhat kiseina'a kon kiladoh ahi. Amaho Christology hi 'Nem' leh 'vaicha' tin akiseije, ajehchu amahon Christa chu mihem maimai danna agel jeh'u ahi. Alang khatna Docetism kiti hi Greek thucheng (verb) '*dokeo*' akon kiladoh hichu 'akilou, akibang (to seem, to appear) tina ahi. Amahon Jesu hi mihem danna hungkilang maimai ahi atiuvin, Pathen mihem banga hungkilang maimai danin ahilui.

Ebionism hon Christa chu Pathen lhingset ahipoi. Pathen chun thohhahsa athohthei louding ahi, Cross'a ahung thoh'a athi hin Pathen lhingset ahilouna avetsah'e atiuvin; alangkhatna Docetism hon aPathen hina adop sangutoh lhonin amahon jong Pathen chun thohahsa athoh theilouding ahi, ahin thohgenthei atoh hi aseilhap naova, Christa Tonsot Pathen chapa chun mihem lim apud maimaija (appearance), genthei athoh'a thina athoh ahi atiuve.

#### 2. GnosticISM

Houbung chu Greek thoho'a lah'a alutna patnin, athuhilu toh Pathen thu chu achoh hal jingun tuhil dihloou tah tah alutnin ahi. Gnosticism hi Greek pao *gnosis* tichu knowledge (hetna) – hetna giltah molna/hetlouna khokhela chunglam Pathen umna lam eilhut theija kingam ahi. Hichehioubung masa holah'a Christian khat bangin ana kilangin ahi. Gnostics hon Pathen hi chamkimtah Lhagao – Thengset ahin, leiset thil (matter) to kitimat (associate) theilou ahi atiuve. Hiejeh chun ama chu thilsem jouse sempa Pathen chu hithei louding ahi ahi. OT 'a Pathen (Jehovah) hi Pathen sanga nemjo ahi atiuve. Mihem hi Pathen toh gamlha tah'a kigamlhat ahitai, ahin atahsa, hinna, Lhagao hi gnosis vanga oltah'a Pathen kom naicheh cheh'a, akhon naleh Pathen toh lhagao khatna hingkhom ahi atiuve.

Amahon thiljouse (matter) hi mihem tahsa jong aboh (evil) ahin, iti danna Pathen chu mihem tahsa'a Christa'a hungthei ham? atiuve. Hiche hi Gnostics ho Christology boina ahin, hijeh chun akhon khon nale Ebionism ahilouleh Docetism'a akiheilut jiuve. Gnostic kimkhat ho dingin Jesu chu mihem tobang maimai (seemed) danin agelun, theophany (Pathen mihemho henga OT'a anakiphondoh naho) dan in agelun, tahsa'a hungdingin agelthei pouve. Hiejeh'a chu 1 Jn. 4:2 nan, hiche tuhil hilho kimaito pina dinga, Christa tahsa'a ahung pen janom loujouse chu Christa-dou (Anti-Christ) ahi ti'a anasei ahi. Alangkhatna Gnostics kimkhaton Christa mihem ahina hi asangun ahi. Ahin aPathen hina chu asang bukim thei kitpouvin, Pathen hilou, miphatan, Baptism achana chu

Pathen'in acha'a asim danin agelun athi'a chu adalah kit ahitan, Cross'a athi'a chu Pathen banga thi hilouva, mihem mai mai ja thi ahi. Hitobang Gnosticism hohi Adoptionism akiti.

### 3. ARIANISM

Arius in anapohdoh, Houbung masaho'a dinga tijat umtah thuhil dihluu, Ebionism banga kilang, tuni changeija houbung sunga umjing nalai khat ahi.

Arius hi AD 320 laiija Egypt gam Alexandria mun houbung sunga presbyter (upa) ahi. Egypt le Greet e Pathen tampi houho lah'a um ahito lhonin aman Pathen thaneina le pumkhat ahina seichet agon, hiche jeh hin Christan Pathen hinna (substance) Pathen toh kibanga anei hi anompon, Christa jong tonsotna anaumsa ahi ti anompon, Pathen in phatkhatna chu anasem ahin, tonsotna um hilou, chapa changkhat jong hilou ahi ati.

Arius thuhil athupi deh ho chu:

- a. Pathen hi khat ahi.
- b. Christa, Thu (logos) chu akisem ahin (created), tonsotna Pathen chapa changkhat ahipoi.
- c. Hijeh chun Christa chu Pathen ahipon, Pathen to kibahna jong aneipoi.
- d. Phat khat laiija chu ana umlou ahi.
- e. Pathen chapa chu ahinan, Pathen chapa tia kouthei jong ahinai. Ahin imacha umlouva kon kisem (created out of nothing) ahin, chapa tahbeh (begotten) ahipoi. Ajehchu Pathen'in cha aneile aloupina kisuneo ahi.
- f. Hiche akisem Logos hi Nazareth Jesu'a hungpenga ahi.
- g. Pathen ahilou vanga, Pathen nei hinaho aneilou vanga, thilsem jouse lah'a Christa hi achungnungpen ahin, houdinga lom tah hija ahi. Pathen ani na (second God) tia kouthei ahin, ahivanga Pathen toh kibang lou ahi.

Hiche thuhil ana kimaito pi jing chu Athanasius ahin, kumtamta pi Arianism hi ana kidoupin, khatvei vei leh achangin anapang jin ahi. Leng Constantine in AD 324 'a anakou "Council of Nicaea" chun Arius thuhil hi themmo ana channun, ahin kumtamta chu mitamta'in anatuh chah un ahi. Ahin Athanasius thinung, AD 381 in "Council of Constantinople" achun anah nah'in Orthodox hon Arianism chungga galjona anei bepmun ahi.

### 4. APOLLINIRIS

Syria gam Laodicaea'a um Apollinaris (390'a anathi) chun Plato thuhil: Mihem hi thilthum (3 elements) na kisem; tahsa, hinna pe'a psyche le lhagao – hi mangchan Christology ana hilchenin ahi. Aman mihema peng Christa chun mihem tahsa aneijin, ahinna jong mihema ahin, hinlah mihem lhagao khela chun Pathen lhagao/Divine Logos aneije ati.

Ahin hiche thuhil jonghi docetism khat ahi. Ajeh chu Nazareth Jesu chun mihem lhagao aneilouleh mihem lhingset hilou ahin, mihem tobang maimai hija ahi tina ahi. Christa chu mihem bulhingset ahilouleh iti danna mihem boina jouse ahethemmma ivetjui dingu hithei ding ham? Hiche Apollinaris thuhil hi "Council of Constantinople" (381)'a chun themmo ana kichanin ahi.

## 5. ANTIOCH & ALEXANDRIA

Hiche phatlai tah hin Theological School thupi tah 2 hobunga ana umin, khatchu Syria gam Antiocha'a um ahin, khatjoh chu Egypt gam Alexandria'a um ahin, athuhil hon leh atahsan dannu ana kibangpon ahi. School of Antioch chu Jesu mihem ahina lam panga alunglutnin, Pathen ahina aselmangin; School of Alexandria chun Jesu Pathen ahina lam pang ahakhoh sah'in, hijeh chun amihem hina chu Pathen hina'in aselmang leuvin ahi. Hijeh hin School of Antioch chu Ebionism lama akaijin, School of Alexandria chu docetism lamma akaijin ahi.

## 6. NESTORIUS

Hiche school teni kibah louna hi Nestorius, Antioch school thalhenga pang (alangkhat langa pang chu Cyril, Alexander'a Bishop, ca. 430 AD ahi). Nestorius chun Jesu mihem ahina lampang ho hatah'in ahuhbitnin, ahin Pathen ahina jong ada dehpoi. Aman Christa mihema apen chun mini: Pathen (Devine Logos) le mihem chu khat sunga umkhom ahi ati. Avetsah nan, thao leh twi khu khon sungkhatna ikoi khomteng akihal louvanga umkhom hon tobang ahi ati.

Hiche thuhi School of Alexandria'in nungah theng Mary chu '*Theotokos*' tichu 'Pathen nu' ti'a aman jeh'u ahi. Nestorius'in hiche hi adeilouna aseina'a Mary chu Christa mihem ahina lampanga ding chun adih'in, '*Christotokos*' Christa nu' ti'a kouthei ahinai. Ajehchu tahsa'a Jesu hinga chu Mary ahinai. Ahin Mary chun Pathen ana hingpoi (Mary chu Pathen nu hithei ponte).

Alexandria mi Cyril'in Nestorius akimaito pina'a, Christa Pathen ahina leh mihem ahina chu kimat behset jeng ahin, hijeh'a chu Pathen nu tiding hi dihmo lou ahi ati. Christa'a chu mihem khatbou um ahin, ahi'a hina (nature) ni uma, khatchu Pathen hina leh khat mihem hina ahi, ati.

Nestorian thuhil hi 431 "Council of Ephesus" in ana demin, Cyril thuhil joh chu san anahin, "Pathen nu" ti title jong san ahin ahi.

**Note:** Pathen nu/Mother of God kiti hi Roman Catholic hon ahaman vangun Protestant houbung hon apai tahbeh lou vangun sang jong asang pouve. Ajehchu aphachom behset jong ahapon, chuleh Christa mihem ahina akisuneove. Pathen nu le mihem nu hilou, Mary chu Pathen-Mihem (God-Man) nu ahinai. Hijeh chun Christa nu joh hi adih theijon, lom jong akilom joi.

AD 431'a Nestorianism hi ana kidem vangin mitam tah'in anatuh det jinguvin, Great Persian church, "Solam Houbung" ti'a kihe chu Nestorian houbung ahi. Amaho hi missionary lungchang nei houbung ahuvun, kumjabih 4 le 5 lai chun a missionary hou hatah'in ana machalin, houbung tamtah India leh China geijin ana phutdoh'un, tuni geihin Kerala'a Nestorian houbung kiti neocha khat aum nalaije.

## 7. EUTYCHES

Amahi Alexandri school of Theology'a kon ahin, docetism toh kinai mama, Christa mihem hina Selmang leuva Pathen ahina haseiho ahivu. Aman Christa Pathen hina le mihem hina chu kigom khoma hina khat kiso ahin, hiche hina chu mihem hina hilouva Pathen hina joh soh ahi ati. Hichu avetsah na'a 'twi le ju hi khon khatna ihal khomle twi khat asoh khomin, ahin atwi chu twi joh hilouvin ju joh ahin, Hitobanga chu ahi ati. Eutiches thuhil hin Christa mihem ahina asuneo lneh'in 451 "Council of Chalcedon" na pai anahi.

## 8. THE COUNCIL OF CHALCEDON (AD 451)

451 Council of Chalcedon'in thuhil dih lou jouse paidoh na dingin hiche thuhil dih hi anasemdoh'un ahi.

“Christa chu eiho dinga Pathen dihtah leh mihem dihtah hija ahi; Pathen hina lamma Pa Pathen toh banga hina (substances) bulhinga nei ahin, amihem hina lamma eiho tobanga mihem lhingset ahi; Christa, Chapa, Pakai, Chapa changkhat, kitihio hi mikhat le akibang, ahi'a hina ni, boina bei, kikhel theilou, kikhen theilou hija ahi” tin seilahnna thulhuh aneijun, hiche tahsan hi tu eiho tahsan jong ahi.

## BUNG – 20

### CHRISTA PATHEN LEH MIHEM KAH'A PALAI AHINA

Christa chu tonsotna Pathen leh mihem kah'a palai ahijinge. Aman hiche palai ahina hi leisetna ahungpen masang peh leh athodoh'a vanna nunga jong atoh ahi. Aman Pa jetlamma touvin eiho dingin ataojinge.

Old Testament'a kimudung juijin, palai natoh hi mopohna (office) thumin akimui. Hichu: Themgao natoh, Leng natoh leh Thempu natoh ahin, hiche natoh thumhi Christa'a abulhina akimui.

Themgao natoh hin Pathen lungdei chu aphonhdoh'in; Mihem te lah'a Pathen thalhengin apangin, Thempu natoh hi Pathen henga Mihem te thalhenga pang, Leng natoh hi Pathen thutan vaihomna tahlng ahi.

#### 1. THEMGAO NATOH (Prophetic Office):

Ex.7:1; Deut.18:15-18; Isai.55:4; 61:1-4; luke:18; 13:33; Jn. 4:25. Themgao thusei jouse hi mipiho chu Messiah hunga dinga akigotna diu thu ngen ahin, Jesu ahung tahchun gaouthusei jouse chu aguilhunge. Ajeh chu Jesu amatah chu Pathen kiphondohna lenpen ahitan, Jesu chu themgao maimai hilouvin, Themgaoho thuhil thuseidoh athu jongchu hija ahi (content of what the Prophets were teaching).

#### 2. LENG NATOH

Jesu chu 'regnum gracia' (Lungsetna lenggam/kingdom of grace) a jong, regnum potenti' (thahat lenggam/kingdom of power) a jong leng hija ahi. Lhagao lenggam lamma seidin Pathen mite lah'a leng ahin, chuleh Pathen lenggam thahatna chu vannoi pumpi hopsoh jong ahi (Ps. 39:35-37; Mtt. 12:28; Jn. 18:36; Rom. 14:17; 1 Cor. 15:24-28).

#### 3. THEMPU NATOH

Hiche natoh hi Pathen anga mihem te chonsetna toh kisai natoh ahi. Thempu natoh Heb. 5:1-4'a kimu chu Christa'a hoitah'in aguilhingin, chuleh aman Pathen lunglhaina dinga anatoh chu khatveija mijouse dingin ajou theng soh'e (Ps. 110:4; Zech. 6:13; heb. 6:1-10; 7:1-28; 9:11-15; 10:1-25; Rom. 3:24,25; 1 Cor. 5:7; 15:3; Eph. 5:2; Jn. 1:29; 3:14-15; 1 Jn. 2:2; 4:10). Hiche natoh athupina hi Pathen le mihem kah'a kiguijopna le kichamna Jesu Christan abulhitna chu ahi. Hebrai 7-10 sung hi Christa tonsot thempu ahina, Melchizedek banga Christa jong tonsot thempu ahi jeh'a thupi ahin, Ama chu Thempu leh kilhaina thilto jong hi'a, eiho jouse chonset jehleh themo jeh'a aman dinga

ahinna apeh ahin, hiche hi Pathen lunglhaisah, lungdam sah ahilouleh chonset lahmang (expiation) akiti. Christa athijeh seh hilouvin ahinlai jengin jong palai natoh hi abulhitnin ahi. Hichu Pathen thu aman jal ahi.